


EBÈLÙ, NSHAPÌTÀ

WA MWANDAMUTEKÈTE ²

 Ànùbènèshè! Ndi ngeela meeji, dyàmbedi ne, tudi apa ne mwànà mukesè wa mu dibòkò, mwàngambidi mwakùnyàànyì wa balùme Doc, mu tusunsa tukesè emu, mwakùnyàànyì mu mubidi, uvwa muswè...uvwakù bwà dimulàmbula. Nènku mpindyewu baamaamù abu pìikalàbo ne bânà bààbò bakesè bàdìbo baswè kulàmbula kùdi Mukalenge, netwikalè ne disànkà dyà kubàmbila bwà kulwabò mpindyewu mene, kulwa ne bânà bààbò bakesè abu.

²³⁹ Mpindyewu, ne bantu bààbùngì, bóbò, cìdibo bàbìikila ne, nkubàbàtiiza aci. Èkèleeziyà wa ba-Méthodistes ùtu ùcyènza, ne ba-Nazaréens ngeela meeji. Ncyèna mutwishùbwe to. To. Ngeela meeji ne pa cyòci aci ki pààkatàpulukilanganàbo, pàvwa mpa dibàtiiza dyà bânà bakesè adi, ba-Nazaréens ne ba-Méthodistes Libres. Kàdi, nànsha nànku, bàmwè bàà kùdìbo, bàdi bènza cintu kampanda. Kàdi, ne bàmwè bàà kùdìbo bàtu bàbàpòngolwela tuumâyì tukesè. Bàmwè bàtu bàbàmyamina màyi. Nènku, kàdi twètù tudi misangu yònsò tuteeta ànu bwà kushààla pabwipi ne Bible mutùdi pèètù bamanyè amu. Mpindyewu, kakwènakù Mufùndù nànsha wùmwè mu Bible bwà mwànà wa mu dibòko kumyaminiiibwayè màyi nànsha, anyì kakwènakù Mufùndù mu Bible bwà muntu nànsha umwe kumyaminiiibwayè màyi to. Kî ncintu cyà mu Mifùndu to. Ndiyi ditùma dyà èkèleeziyà wa Kàtòlikè.

²⁴⁰ Kàdi bóbò—kàdi bóbò bàtu bènza, bààkatwàla . . . Bààkalwa ne bânà bakesè kùdi Yesù. Ne—ne twètù butùdi naabù mbwà kuleeja mpàla Wendè. Tudi baswè kwenza cintu cimwècimwè cyàkenzàYè Yèyè aci. Yèyè wàkabàtentekela byanza ne—ne wàkabàbènesha, ne kwamba ne: “Lekèlaayi bânà bakesè bàlwe kùNdi, ne kanùbàkàndiki nànsha, bwalu Bukalenge bwà mu Dyulu mbwà aba bàdi bu bóbò.” Nènku ki citùdi twètù tutùngunuka ne kwenza ku tabernacle eku, patùdi tuteeta kutùngunuka ne mùshindù mulelèlè, mulàmbula wà Bible, ne mwètù mwònsò mutùdiku pèètù bamanyè amu.

²⁴¹ Nènku mpindyewu, pìikalà maamù awu, anyì baamaamù kanà bònsò bàdi ne bânà bààbò bàà mu mabòkò bàà kulàmbula abu, pàdi Mwanèètù wa bakàjì Gertie wimba ku cisanjì *Bwelàayi Naabò Mùneemu* apa, mòna’s, lwàyi naabò ku cyoshelu. Mèmè ne mwanèètù wa balùme netùlwe ne netùlambulè bânà bakesè abu kùdi Mukalenge. Eyo.

Mwanèètù Neville. . . [Katùpà kàà mukàbà wà mèyi munda mutupù—Muf.]

242 Twasàkidila, Mwanèètù wa bakàjì Gertie. Abi mbilenga be. Mbanganyi bàtùku banangè bàna bakesè? Wèwè kùyi mubànangè to, kùdi cintu cipampàlāmùke mu wèwè amu, kùdi cintu cipampàlāmùke.

243 Mpindyewu, dilòòlò edi, mpindyewu bwà kubwela mu bitùpà bikwàbò byà masangisha. Tudi . . . cidi cyenzè ne ngiikalè mwalùkile cyàkàbìdì dilòòlò edi. Pa ciibidilu mu matùkù aa patùdì ne midimu yà dyondopa, ndi ngangata ànu bu wùmwèpelè nànkù ku ditùkù, bwalu bìdi binnyùkusha bikòle. Nwènu kanùtukù bacimanyè to. Ne kwètù kumbèlu eku mbibì misangu yibidì kutàmba mwaba mukwàbò kanà wònsò.

244 Nènku mvwa ndòmba luse bwà mùmvwà mucyènzè bibi mu dindà emu amu. Kàdi cintu cyà kumpàlà cìvwà cintàcishe, mpàvwà Billy mulwè bwà kungambila ne kàvwa mwà kusangana bantu búngì bukùmbàne bàà kwabanyina twartà twà disambila to. Mmutwàbànye ànu bu dikùmi ne tùbìdì anyì dikùmi ne tùnaayi nànkù awu. Ne ùvwa ne . . . Muntu nànsha umwe kavwà muswè twartà twà disambila to. Ngeela meeji ne byònsò bìvwa bìmpè. Nànkù dibà adi, ku cyòci aci, ncìvwakù mwele meeji . . . Ne pashiishe pàngààbangì kubiikila twinè twartà twà disambila atu, mvwa ngeela meeji ne nèmpetè twònsò dikùmi anyì dikùmi ne tùbìdì atu, anyì twònsò tùvwà mwà kwikalàmù kaaba aka atu. Mémè kutùbìikila. Mémè kufika too ne ku nombà kampànda, cintu kampànda, kàdi kakùyikù dyandamuna to. Ki mémè kubiikila. Kakùyì dyandamuna. Kàdi ncìvwakù mukwèlèlè meeji to too ne pàalu Màdamù Wood kumbiikila ku telefòne. Kwambayè ne: “Mwanèètù Branham, Billy ùdi wàngata twartà atu ùtùcyòmpakaja twònsò, ne ùtwàbanya ànu nànkù. Ùvwa mufwànyine kwikala mushàale ne nombà isàtù awu,” (kàvwa nyèyè anyì?) “nombà isàtù awu mu mpaayà.”

245 Cyà bushùwà, yèyè pa ciibidilu ùtu wàbanya twònsò makùmi àtaanu. Pàdiye ùlwa naatù kumpàlà kwà bantu, ùtu ànu ùtùcyòmpakaja cyànààna. Nènku bantu bònsò . . . Kì mbyà kwamba ne: “Mpèèshè mémè nombà umwe” to. Anyì, tudi bafwànyine katùyì tubangila ku nombà umwe to. Tudi bafwànyine kubangila ku makùmi àtaanu, wèwè kwèna umanya to, kàdi kwalukila cyànyimà. Tudi bafwànyine kubangila ku mwandamukùlù kàdi kuya kuulu. Tudi bafwànyine kubangila ku makùmi àbìdì kàdi kuya kuulu. Katwèna bamanyè to. Kàdi yèyè ùtu ànu ùtùcyòmpakaja kàdi kutwàbanyina bantu pàdìbo bàtùkèba apu. Kàdi mémè, nciyi mwelè meeji ku cyòci eci mu dindà emu to, ndi mufwànyine kwikala mubiikile tukwàbo tunaayi anyì tùtaanu, pàatù katùyì tufwànyine kwikalakù to, bwalu kàvwa kafwànyine kwikala mu twà makùmi àbìdì anyì makùmi àsàtù mu mwaba kampànda, nudi numòna’s. Ne, pashiishe, kàdi Mukalenge mmulongòlòle byònsò, kàdi kabyèna ànu bifila—bifila dicincimikiibwa dyà menemene mu

cyôci, mùtùbi byènza pândi kule ne kwànyì kumbèlu to. Ndi mufwànyine kubènga kuciteetakù—kuciteetakù kàbidì.

²⁴⁶ Kàdi, kî nkwanjì kwenza ntàntà mule to, mvwa mulòmbe Mukalenge ní Ûvwakù mwà kutùpèèsha disangisha dîmpè, mu mùshindù wà ne mvwa mulayè ne ncìvwakù—ncìvwakù mwà kuMulòmbe kàbidì nànkù to, bwalu cìvwa cintu cìkolè be. Ne ciinè aci ncìbèngàngàne ne Mifundu. Nwamònu anyi? Ne panwikalà. . . Ki cìdì cìcìvwijà cìkolè bwànyì mèmè ncyôci aci. Bwalu, mùndi mumanyè nànkù, cìdì cyumba cìmpèèsha di—dicimunyiibwa's. Nwamònu anyi? Ndi mucimunyiibwe, ànu ku ntwadijilu kwine.

²⁴⁷ Cibi, muntu mmubiikile muntu kampànda mu mapingaja emu. Màndàmù Woods ùvwa mubiikidibwe ku tèlèfonè kùdì muntu kampànda. Ne mmwambè, ne: “Bàvwa babiikile muntu kampànda mu èkèleeziyà mu dindà emu, bwà muntu uvwa usaama bikolè, bikolè, udi mulwè kùdì Kilistò mu mapingaja emu, pashìishe.” Wàmba ne—ne muntu uvwa usaama bikolè awu mmulwè kùdì Kilistò.

²⁴⁸ Ne bukwàbò bwalu, Màndàmù Woods mmungambile ne mvwa muyiikile ne mwanàabò wa bakàjì, yààyèndè, ne ncyà bushùwà ne mvwa mu nzùbù mwèndè ditùkù adi ne badyè nendè didyà dyà mundaamuunyà, anyi badyè nendè didyà dyà dilòlò, mu Kentucky mwàmwa. Kàdi Nzambi wa Bukolè bwónsò mmumanyè ne ncìvwa mujingùlùle mukàjì awu to. Nwamònu anyi? Ncyà bushùwà. Ànu. . . Bikèèna—kumòna mbidishikàmine. Katùtukù bamanyè mwikalàbi mwà kuya anyi cìikalà mwà kwenzeka to. Aci ncitàngile Nzambi, ne bwà—bwà bidì byènzekà. Kàdi bushùwà ngàkamanya, mu kubìndila, mbìndila mwab'awu.

²⁴⁹ Nènku ditùkù adi pàvwà mwànà mutekètè wa bakàjì awu kaaba aka apu, uvwabò bàmba ne ùvwa ne dijingulula awu, cìndì mèmè, nciyi. . . Nwamònu's, bu ne Nzambi ùvwa mufile cyôci aci kùdì bàà pa buloba bujimà, s'bvivw'a kwikalà bilenga; kàdi bu byôbi nànkù, bìvwa mwà kwikala bìbèngàngàne ne cyàkangambilàYe dìnsambù dyà mùsèèsù mwab'ewu, nudi numòna's, kùkaadi ndambù wa bidimu. Kàdi tuvwa baswè kwikala batwishiiibwe ne cìvwa cyà bushùwà, ne kwenza bwà ne èkèleeziyà, bu mùvwàbi ne bìvwa ng'apa, àcimònè. Nènku mèmè kubiikila mwinè Màndàmù Snyder awu. Mwanèètù wa bakàjì Snyder. Ûdi apa mwaba kampànda. Ûdi ànu ne ndambù wa lutàtù lwà kuumvwa. Nènku inàbànza mukesè awu ùvwa mucyàmbè ne dīyì dikesè, mwambè ne: “Wèwè udi ne dīsaamà dyà ngàlàbàtiizà,” anyi binyòka, cintu cyà mùshindù awu.

²⁵⁰ Pààbi, mèmè mvwa mumanyè ne ncìfukà cìcìbùke. Nènku ewu, nènku dībà adi Nyumà Mwimpè nyawù wàcìtwàdi mu dindà emu. Nwamònu anyi?

²⁵¹ Mpindyewu, bwalu bùdi ne, ndipà dyà kùdì Nzambi, ne dītu dikwàta mudimu mu budishikaminyi bwàdi. Kàdi cìdì

cyènza ne bwalu bwikalè bukolè menemene mu cimenga emu, bwà kwamba menemene, ndi—ndi mbwela mu bwalu bwà mwandanjinga, dîbà dyônsò, pândi nsambidila babèèdi kaaba aka. Anyi—anyi. . . Ndi mwa kuya, nkambilè bantu nùku. Ndi mwà kuya, nkambè ne: “Mpindyewu Mukalenge wánwòndòpù. Yesù wàkanwòndopa pààkanùfwilàYe apu, kùkaadi bidimu cinunu ne nkàmà citèèmà. Pòpù apu mene mpanwàkondopiibwà. Mpindyewu, bwà Nzambi Yèyè, bwà Kilistò, nudi bondòpiibwe, kùkaadi bidimu cinunu ne nkàmà citèèmà. Disaamà dyèbè dyàkajika. Bìdi bìkèngela diitabuuja dyèbè bwà kucyènza.”

252 Ne pashìishe muntu awu ùdi mwà kuumuka kuya kàdi kàyi ùmvwa bìmpè to. Pashìishe muntu awu wàlukila, wàmba ne: “Mwanèètù Branham’s ùvwa mungambìle ne mvwa bìmpè.” Nwamònu anyi? Cíndi mèmè nkwambila ncìdi Nzambi mwambè.

253 Mpindyewu, pàdici cyàmbidiibwa muntu awu buludì, buludì ne: “Cìdi ng’EMU MÙDÌ MUKALENGÈ WÀMBA,” pa cintu kampàndà ciikalà mwà kwenzeka. Aci’s necikujaadikilè mwaba awu mene ne dyondopiibwa dyèbè dikaadi dishindikìibwe. Diitabuuja dyèbè ndidì dicitwe citampì. Wamònu anyi? Mulaayi ngwèbè wèwè. Kì ndíyi dyànyi mèmè to. N’Díyi dyà Nzambi, dyà ne wèwè ukàadi mumanè kwondopiibwa adì. Wamònu anyi? Kàdi wèwè udi ànu. . . Mu mùshindù kampànda anyi kansanga, mèmè—mèmè ncyènàku ànu mwà kucifikisha ku dibwela to, mu bantu bàà mu Jeffersonville aba. Mèmè—mèmè ncyènà ànu mwà kucifikisha ku dyenzeka to. Ndi mumanyè. Ndi mwa kuteeta kucyumvwija ànu bìmpè menemene ne mwànyi mwònsò, kàdi kacìyi ànu—kacìyi ànu mwà kwenzeka to. Kwajikì. Ndi ngamba. . .

254 Mùneemu emu, ànu àbìdi aa, mvwa muyè kumbèlù kampànda, kùdì muntu mulùme kampànda, ne muntu awu ùvwa ùpunga ne lufù. Kì kumbiikilabò ne: “Lwàku, ùmusambidilè. Ngàngàbukà mmwambè ne kàakuciisha to.”

255 Mèmè kubwela. Kì nsongààlùmè awu kungambilayè ne: “Mukalenge Branham, ncyèna muswè kufwà to.” Mòna’s, ncyà bushùwà ne nsongààlùmè awu kàvwa muswè kufwà to. Úvwa ne dìkù dyà bânà bàbìdi mwaba awu.

256 Èè, mèmè kuseemena. Mèmè ne: “Mpindyewu, tàngilà, ngàngàbukà webè nganyi?” Kungambilayè. Mèmè ne: “Mpindyewu, ngàngàbukà mmufwànyine kwikala mwambè ne wèwè uvwa—wèwè uvwa ne cyà kufwà, kàdi Nzambi Yèyè kí mmwanjì kwamba ne wèwè neufwe to.” Mèmè ne: “Mpindyewu, bilondèshile Bible, wèwè ukàadi mumanè kwondopiibwa, bwalu Yesù wàkafwà bwà dyondopiibwa dyèbè.”

257 Yèyè ne: “Wèwè udi witabuuja ne nèngùmvwè bìmpè anyi?”

258 Mèmè ne: “Ndi ncìitabuuja kakùyi mpatà to.”

259 Èè, mèmè muyè bwà kasambidila muntu, kàdi nciyi nkwàta mudimu ne diitabuuja dyà mùshindu awu to, bwà kwitabuuja bwèndè yéyè; bu mèmè muyè ne: “Kaa, to, to, piikalàbi ne ngàngàbukà mmwambè ne neùfwe, neùfwe. Aci’s ncikòse bwalu mpindyewu.” Mpindyewu, awu kî mmufwànyine kwikala muntu wa ùlwa kusambidila babèèdi anyi? Mèmè ncyènakù mufwànyine kuswà muntu awu mu nzùbù mwànyì to, bwà kunsambidila. Ntu mèmè muswè muntu wa ne, nànsha kàyi mucimòne to, anyi to, mufwànyinekù kwangata diitabuuja kwimanyina pa mulayi bwànyì mèmè. Ncyà bushùwà. Ki mèmè kwamba. . . yéyè. . .

260 Twètù kuya e kwenza disambila. Mèmè kwamba ne: “Mpindyewu kolèshà mwoyi.”

261 Yéyè ne: “Udi muswè kwamba ne nèngǔmvwè bîmpè anyi?”

262 Mèmè ne: “Mòna’s, bushùwà’s. Dìyì dyà Nzambi’s ndyambè ne newǔmvwè bîmpè. Wamònu’s: ‘Bu wèwè mwà kwitabuuja, maalu ònsò àdi mwà kwenzeka.’”

263 Yéyè ne: “Èyo, nènCìtàbùùjè.” Ki mèmè kupàtuka kuya kambila mukàjèndè ne. . .

264 “Muntu ewu ùdi ùpùnga ne lufù, kî mmwòmò anyi?”

265 “Èyowà, mmwòmò.” Kàdi ditùkù dyàkalondà, muntu awu kufwàye, anyi ndambù wa matùkù paanyimà pàà cyòci aci.

266 Pashiishe mukàjì awu kupàtukayè ne kubangayè kunwà maalà ne kwenza maalu a lukutukutu. Ki umwe wa ku balami, ngeela meeji ùvwa nyéyè, wa mu èkèleeziyà emu, kuyayè kùdi mukàjì awu kumulòmbayè ní ùvwakù mwà kwalukila mu èkèleeziyà. Mukàjì awu ne: “Ncyèna mufwànyinekù kwitabuuja muntu nànsha umwe to. Muiyiishi Branham mmulwè mwab’ewu musambidile bàyaanyi, mwambè ne neikalè ne mwoyi, kàdi mmufwè paanyimà pàà matùkù àbìdi anyi àsàtù. Nènku, ncyèna muswè kwitabuuja to.” Patùdi twakulangana apa *yéyè* mukàjì awu ki kupùngayè ne lufù eku. Èyo.

267 Kàdi, nànsha nànkù, nudi numòna’s, bìdi ànu bileeja ne bantu kabèèna bàtèya ntèmà ku byùdi wamba to. Nwamònu anyi? Cyà bushùwà. Mèmè musambidile muntu, s’ndi—s’ndi ngambila bantu abu ne nebìikalè ne mwoyi. Mèmè’s ndi ngiitabuuja ne nebìikalè ne mwoyi. Kàdi, nànsha byòbì ne, bu kakùyi mpàtà to dìyì dyànyì diikàle EMU MMÜDÌ MUKALENGE WÀMBA, ne wèwè kubènga kuCìitabuuja, s’neùfwè, nànsha bìshi. Cyà bushùwà. EMU MMÜDÌ MUKALENGE WÀMBA nyéyè *ewu*, ne bààbùngì bàà kùdìbo bàdi bàCìpeta kàdi bàfwa. Bààbùngì bàdi bàya mu ifèrnò, pààbì, EMU MMÜDÌ MUKALENGE WÀMBA mwambè ne: “Kabyèna bikèngela bwà wèwè kuyamù to.” Ncyà bushùwà anyi? Bushùwà. Nwamònu anyi? Ncidi. . . Byònsò mbiimànyine pa diitabuuja dyèbè.

268 Mwanèètù Collins, ncyèna ngeela meeji ne ùdipù dilòòlò edi to. Kàdi pâmvwà mmutèeleja mu dindà emu, mmufile muiyiiki wà dikima pa bwalu abu. Nwamònu anyi? Nwamònu anyi? Èyowà's. Mmwambè ne: "Mpindyewu, diitabuuja òm̀wèdìmwè dyúdi naadi apa adi, ndyàkèngelà bwà wèwè kwikala naadi kuntwaku. Bwalu, ndiitabuuja dyèbè dyà sungasunga, kadiyi dyà mu òngumba dyènù to, kàdi mu Kilistò. Bikèngela wikalè ne diitabuuja adi." Aci ncyà bushùwà menemene. Kakùyi mpatà to.

269 Ne dyondopiibwa dyà kùdi Nzambi ndiimànyine pa diitabuuja dyèbè. Kàdi bilondèshile Dìyi dyà Nzambi, EMU MMÙDÌ MUKALENGE WÀMBA, ne muntu yònsò wàkondopiibwa pàakafwà Yesù ku Kàlvariyò, "Wàkatàpiibwa mpùtá bwà dishipa dyètù dyà mikenji, ku mibùndàbùndà Yèndè *twákamana* kwondopiibwa." Ncyà bushùwà anyi? Twètù *twákamana*. Bible mmwambè ne: "Wákamana kwondopiibwa." Pa nàнку kùndyulù mèmè to, mèmè ndi ànu muiyiishi cyanààna wa Dìyi. Ndà kambilè Nzambi ne Yèyè ngudi mwambè cintu cyà mashimi, ne Nzambi díbà adi neàkwambile mwaba wùdi butekètè bwèbè bùsanganyiibwa. Wamònu anyi? Pa nàнку, ndiitabuuja dyèbè. Yesù wákamba ne: "Bu wèwè mwà kwitabuuja. Bu wèwè mwà kwitabuuja."

270 Mpindyewu, paùdi umvwà ne Nyumà Mwìmpè wàshìndiki diitabuuja dyèbè ne wàdishindamiji, ne wàm̀bi ne: "EMU MMÙDÌ MUKALENGE WÀMBA: 'Màalabà pa díbà *kampànda* edi, neùpetè cintu *kampànda*. Cintu *kampànda* necyènzekè. Neciikalè mwab'ewu mu mùshindù *kampànda*, ne neùtwilanganè ne cintu *kampànda* apa nùngu. Ki ciikalà cimanyinu kùdi.'" Mpindyewu, tàbaleelà aci. Aci mmidimu mujikija, apa mene mpindyewu.

271 Kàdi pàkaadici cikamba bwà dyondopa dyà kùdi Nzambi, bikèngela nteekè dyondopa dyà kùdi Nzambi pa cishìmikidi cìmwècìmwè aci, cyà mùshindù awu, bu mùdi lupàndu. Yònsò wa kunùdi, cyùdi mwenzè nànsha ciikalè cinyi, wàkasungidiibwa kacya pàakafwà Yesù apu, bwalu Yèyè wàkafwà bwà kuumusha mpèkaatù yà bàà pa buloba. Kàdi kacya kwikalakù ne dikwàcisha kùdi to paùdi kùyi ucitaba wèwè mwine ne ucilabula. Kàdi bwà mpèkaatù yèbè kaayi, yikaadi mimanè kufwidiibwa luse. Ncyà bushùwà. Yèyè. . . "Mònaayi Mwànà wa mùkòkò wà Nzambi udi umusha mpèkaatù yà bàà pa buloba." Nwamònu anyi? Ki bwalu abu's. Mpindyewu nùvulukàayi aci.

272 Mpindyewu, ndi mumanyè ne mu dilongesha, mu Mifùndu, tudi disangisha dyà bantu basambàkàne. Misangu yàbùngi, mu Mukàndà wà Ebèlù ewu, wùdi Mukàndà wà ndòndò mule menemene. . . Nebikèngelè ngùlekèlè bwà katanci mpindyewu. Nènteetè dilòòlò edi bwà kujikija citùpà cyà ndekeelu cyà nshapitá wa 7 awu.

273 Nèngu mpindyewu kùdi nkonko yàbùngi mu mitù yènù amu, kakùyi mpatà to. Bàabùngi bàà kunùdi bàdi ne nkonko, ne mèmè

ndi mufwànyine kwikala pàanyi naayi. Mpindyewu musangu wùdi wùlondà, bu Mukalenge mwà kwanyisha, pàngaàlwà . . .

274 Nyààya ku Michigan mpindyewu. Ne pashìishe, kuumuka ku Michigan, nyààya ku Colorado. Ne kuumukila ku Colorado, nya ku Côte Ouest. Mpindyewu—mpindyewu, patwàbwelà, bu Mukalenge mwà kwanyisha . . . Mpindyewu, ncyèna mumanyè to. Mèmè ncyi mu Chicago, mu dyàlumingu to, ndi mwà kwalukila apa bwà dilòlò dyà dyàlumingu dilwalwà edi.

275 Mpindyewu tudi kaaba aka bapangishe mpaasàtà wetù bwà kwikalayè ku cyambilu kwènji mbingu mitwè ku yisambòmbò, mu dipicila dyà mu—mu—mu, mu Mukandà ewu. Nwamònu anyi? Mpindyewu tudi . . . Ncitu muswè kwenza nàнку to. Mwanèètù Neville mmwanèètù mulenga, wa kalolo, wa musàngeelu. Ne ndi mumanyè ne èkèleeziyà ewu mmunangè Mwanèètù Neville.

276 Byòbì biine, pàndi munkaci mwà kwakula apa, muntu kampànda, mu mwaba kampànda mu ditùnga emu, mmwambùle dipiilà dyà kwikala mufunde twartà, bwà kwipata Mwanèètù Neville ku cyambilu eci. Nebikengelè bwà wèwè kulongolola bwalu abu naanyi mèmè. Uh-huh. Ncyà bushùwà. Uh-huh. Èyowà, cyà bushùwà's. Mpindyewu, ndi muswè bwà wèwè . . . Mwambè ne balam- . . . cintu kampànda cyà citàngila kasumbù kàà balami. Kasumbù kàà balami kakèena ne cyà dyenza ne mpaasàtà wàwa to. To, mukalenge. Disangisha, mu kaabujimà, ndidi ne bukòokeshi bwònsò. Kí . . . Kasumbù kàà balami kàdi ànu mpùlushi cyanààna mu èkèleeziyà emu, ànu bwà kulama bulongàme ne bikwàbò. Kàdi pàkaadibi bitàngila tunungu, èkèleeziyà mu kaabujimà ngudi ne cyà kwamba nàнку. Èkèleeziyà ewu mmwibakila pa budishikaminyi bwà èkèleeziyà wa pa kaaba. Ki bwà cinyi, mèmè ncyèna ne cyà dyamba mu dyumusha dyà mpaasàtà ewu to, anyi bwà kupingaja wa cyanààna. Lupangu ndwanyi; ndupèesha èkèleeziyà. Nwènu ki èkèleeziyà. Nwènu mbàdi bàkòntononà. Nwènu ki èkèleeziyà, nwènu biinè. Ne Èkèleeziyà, Èkèleeziyà wa cijila wa Nzambi udi ne mwoyi ki udi budishikaminyi, bwà Nyumà Mwîmpè mu Èkèleeziyà awu. Ne cintu cimwèpelè cindi mèmè ngenza cidi ànu kwikala mwena lupangu, kulùpèesha èkèleeziyà ewu, bu mùdi kulùfila bwà èkèleeziyà, ne ndwà kabàyi bàfucila bitàdi to. Nènku èkèleeziyà ngudi udisungwila bampaasàtà bèndè sungasunga. Mèmè ncyèna ne cyà dyanzamù nànsha cimwè to. Ne mùshindù wùmwèpelè wùdiku mpaasàtà ewu mwà kuumuka, mmufwànyine kwikala wà ne mpaasàtà yèyè nkàayendè àngatè dipàngadika dyà kuumuka, anyi ciibúngi cyà tukandà twela tufwànyine kwamba ne: “Shintùlùlaayi mpaasàtà.” Ki mùshindù wùmwèpelè ngwòwù awu. Kasumbù kàà balami nànsha kàmwè kakèena mwà kucyènzakù to. Kasumbù kàà balami kàdi kòkò kàlama ànu bulongàme cyanààna ne bikwàbò mu èkèleeziyà.

277 Balubuludi, kabèèna ne cyà dyenzamù to, ànu kulongolola kwà èkèleeziyà. Nènku bôbò kabèèna mwà kucyènza to pàdiku kakùyi. . . Kasùmbù kajimà kàà balubuludi kàdi kàdisangisha kàmba ne: “Netwìbakè *cikampànda*, anyì netwènzè *cikansanga*.” Dìbà adi bikèngela bàkonkè mulami wa cibùcilu ní ùdi ne mfrangà bwà kucyènza. Èyowà’s, mukalenge.

278 Kàdi kwôkù didyàbakeena bwà cidimba kampànda, cidimba cyôci cidyàbakeena bwà cikwàbo, anyì cintu kampànda cyà cibi, bùdi naabù mbwà kuya kùdi mwanèètù awu, wèwè mwinè, ne kuyiikila nendè, wèwè ne yéyè pàà nkààyeenu. Dìbà adi yéyè kàyi muswè kwakidila bwalu abu to, dìbà adi cintu cidì cilondà cidì cyènzekà, udi wangata umwe wa ku balami anyì muntu kampànda, àye neebè kùdi yéyè mwanèètù awu. Dìbà adi yéyè kàyi muswè kunwàkidila to, dìbà adi udi ulwa kucilondela èkèleeziyà. Dìbà adi piikalà èkèleeziyà. . . Dìbà adi yéyè kàyi muswè kwakidila èkèleeziyà to, dìbà adi Bible mmwambè ne: “Yéyè ikalè bu mumpàngaanù ne mumpùblikaanò.” Aci ncyà bushùwà.

279 Nènku muntu yònsò udi mumanyè muntu mupiiile, kàdi wèwè kùyi uya kùdiye bwà kuyiikila nendè to, dìbà adi wèwè ngudi citùpà cyà èkèleeziyà wa Nzambì ciikalà ne cyà kulumbulula bwà mpèkaatù awu. Ncyà bushùwà.

280 Nènku bantù bôbò dìbà adi ne di—didyàbakeena bwà mulami kampànda, anyì bwà mulami udikù awu anyì muntu kampànda mu èkèleeziyà, bìdi bièngela bantu bàsàtù. Bantu bàsàtù mbafwànyine kulwa ne kwamba, kujaadika, mukana mwà bantèmù bàbìdi anyì bàsàtù. Bálwe bàmbilè mpaasàtà ne kùdi bwalu bwà didyàbakeena bwà mulami kampànda. Dìbà adi kwôkù bwalu bwà didyàbakeena bwà mulami kampànda, mulami awu kèna mu—muntu mululàme, mu—muntu mupwàngàne to. Yéyè ùdi ne cyà kulama mudimu wà bulami, kàyi ne cyà dimubanda naacì, ne dìbà adi àsanganyiibwe kàyi ne cyà dimubanda naacì to. Kàdi disangisha adi dyôdi disangàne ne mulami awu kèna ùlama mudimu awu to, yéyè ùdi wàngata bantu bàsàtù ne ùya katwàla bwalu abu kùdi mpaasàtà. Mulami awu àlombiibwè bwà kushààla kumbèlu dyôdi dilòòlò adi. Nènku dìbà adi mpaasàtà ku. . . ùdi ulwa úsangisha èkèleeziyà, wàmba bwalu bwà didyàbakeena abu. Kàdi disangisha dyôdi dyelè tukàndà dyambè ne mulami awu àtùngunukè, mulami awu ùdi ùtùngunuka. Yéyè mutùngunùk-. . . dyôdi dyelè tukàndà dyambè ne mulami awu ùmushiibwè, bàdi bàsungula mulami mupyamùpyà dilòòlò dimwèdimwè adi mene. Nwamònu anyì?

281 Ki bwà cinyì, muntu umwèpelè kèna ne cyà dyenza mu cyôci eci to. Nciibùngi cyà bantu. Èyowà’s, mukalenge. Makùmi àbìdi ôwò meelè tukàndà mamwitàbe, ne makùmi àbìdi ne umwe meelè tukàndà mamubènge, ùyaaya; anyì, eci anyì eci. Nwamònu anyì? Mbwena kwamba ne, mbudishikaminyi bwà èkèleeziyà wa pa kaaba ne, dìbà adi, yònsò wa ku bidimba byà èkèleeziyà ùdi ne

díyi dyà kwamba mu èkèleeziyà. Cintu kampànda cyènzeka, cibi, díbà adi bàdi mwà kudisanga, ne cintu címwèpelè cidi cikèngela kwenzabò nkusanganyibwa kumpalà kwà Nzambi bwà kakùyi mpatà to bènze bwà kakwikadi cintu kampànda cyà cìpangisha lwendu lwà èkèleeziyà to.

282 Kàdi bukòokeshi mu kaabujimà ne bukùmbànàngàne bwà èkèleeziyà mmpaasàtà. Nùbalàayi aci mu Bible, nùmone aci ní kí mbulongàmè bwà Bible. Ncyà bushùwà menemene. Kakwèna muntu nànsha umwe kumutù kwà mukùlù to. Mémè ncyèna ne cyà dyanza ne cidi Mwanèètù Neville wènza kaaba aka to. Aci ncinutàngile nwènù ne Mwanèètù Neville. Bu ne Mwanèètù Neville ùvwa muswè kuyiisha dilongesha dyà Bantèmù bàà Yèhowàh, aci ncimutàngile yèyè ne nwènù. Nwamònu anyi? Bu ne yèyè ùvwa muswè kuyiisha ní ncinyi cyònsò civwàye muswè kuyiisha aci, aci cidi pankaci pèènù ne yèyè. Kwàjiki. Disangisha dyòdi dyelè tukànda dimwanyishile, bwà kuyiisha cyòci aci, abi mbimpè. Aci ncimutàngile.

283 Cintu címwèpelè cindi mémè ngenza, cidi ànu kwikala mwena lupangu. Kàdi cintu kampànda anyi kansanga cyòci cyenzèke, bu mùdi kuumusha mpaasàtà, ne bóbò baswè kwela tukànda pa bwalu abu, kanwèna bafwànyine kulòmba mulami kampànda bwà kucyènza to. Nudi bafwànyine kulwa kunndòmba mémè. Mémè ndi mufwànyine kulwa, kwamba ne: “Ní nudi baswè kuumusha mpaasàtà, ngambilaayi ne mbwà cinyi. Mmwenzè bwalu anyi?”

284 “Èyowà. Tudi bamujìkidile, mukwàcìke maala.” Anyi ne: “Tudi bamujìkidile wènza *cikampànda*, anyi wènza cintu kampànda cidi kaciyi cimpè to.”

285 “Nudi ne bantèmù bàsàtù bwà bwalu abu anyi?”

286 “Èyowà. Tudi naabò.”

287 Bikèngela bwà bantèmù bàsàtù abu bǎnji bàteeciibwè dyàmbedi. “Kwitabi difùndiibwa dyà mukùlù to pàdiku kakùyi bantèmù bàbìdi anyi bàsàtù, ne bóbò bǎnji bàteeciibwè dyàmbedi; bwà mukùlù.” Pashiishe bikèngela nùdicipè bwà cyòci aci ne, nuvwà bacimòne; ne nucijaadika ne, nuvwà bacimòne.

288 Ne díbà adi, pìikalàbi ne nuvwà bacimòne, díbà adi bikèngela mpèkaatù awu àtandishiibwè patòòke, ne: “Mbibi.” Pashiishe kwamba ne: “Nwènù disangisha, nudi baswè kushintulula mpaasàtà wenù anyi?”

289 Nènku disangisha dyòdi dyelè tukànda ne: “Mufwìlaayi luse, ne mulekèlaayi ànjì àtungunukè,” ki mùshindù wùdibi bikèngela kwenjiibwaci ngòwù awu. Nwamònu anyi? Abi, kí mbijalàme anyi? Awu kí mmùshindù wà kulombola èkèleeziyà anyi? Ki cidi Bible mwambè ncyòci aci. Twètù katwèna ne byà bèèpiskòpò anyi byà batàngidi, ne byà tusumbù ne bikwàbo abi to, bwà kupèesha *kampànda* mwànzu ne mwikàle ne bukòokeshi

bwàbùngì. Kakwèna muntu nànsha umwe udi ne bukòòkeshi kaaba aka to pa kuumusha Nyumà Mwímpè. Aci ncyà bushùwà. Yèyè ngudi umushangana. Ne tudi tuMwangata Yèyè bu ciibùngì cyà bantu, mùyaaya bantu amu.

²⁹⁰ Nènkù dîbà adi piikalà luseke lùmwe luswè kwenza *cikampànda*, ne luseke lukwàbò luswè kwenza *cikansanga*, kàdi luseke kampànda kucimunalù, luseke lwà bàdi bapangile abu, cidìbo bènza ncinyì pa bwalu abu? Bàdi bàdisanga buludì ne bakwàbò abu, bàmba ne: “Nànkù, tuvwa batùpàkàne. Netùtungunukè ànu nànkù, bwalu Nyumà Mwímpè ngwenjì disungula adi awu.” Nwamònu anyi? Ncyà bushùwà menemene.

²⁹¹ Mùdi ba-Démocrates ne ba-Républicains, pàtùcidi anu biimàne bu mungàlààtà, bu beena Àmèrikè. Ba-Démocrates nì mbàdi ne bukalenge, bikèngela ba-Républicains bàbàtwè nyama ku mikòlò; ba-Républicains nì mbàdi ne bukalenge, bikèngela ba-Démocrates bàbàtwè nyama ku mikòlò. Nwamònu anyi? Ki cyòci aci menemene cidi cyènza ne twètù aba twikalè ditunga. Musangu wónsò wutùdi tunyangakaja aci, mungàlààtà wètù ngutùdi tunyangakaja. Aci ncyà bushùwà. Ba-Démocrates bàmba ne: “Ncyàkwenzakù cintu to; ba-Républicains nyawù mbàdi ne bukalenge.” Dìbà adi's twàpangìdi bwalu. Mèmè ntu mwena Kentucky: badisangè tutwàtwa makàsà panshì, batàpùlùke ncibùlà pa cyòci.

²⁹² Mpindyewu, kòkù cintu cyènda bibì mu èkèleeziyà cyùdiku wèwè mumanyè, muntu-nkààya kampànda anyi muntu kampànda anyi cintu kampànda, nwènù mbàdi beena dibànza adi ne nenùlumbululè kumpàlà kwà Nzambi panùdi kanùyì nulongolola bwalu abu to; nwènù, èkèleeziyà. Mpindyewu, vùlukàayi ne, kaciyèna pa makaaya àanyi mèmè to. Cidi pa makaaya ènù nwènù. Ne cintu kaciyi cyènda bimpè mu èkèleeziyà, Nzambi neànùlumbùlwishè bwà bwalu abu. Ncyà bushùwà. Ki mùshindù wùdiYe ùlombola èkèleeziyà Wendè ngwòwù awu. Ki mùshindù wùdibi mu Bible. Ki bulongàmè bwà Bible. Ki budishikaminyi bwà èkèleeziyà wa pa kaaba. Mpaasàtà ngudi mutù. Ncyà bushùwà. Amen.

²⁹³ Mpindyewu, tuyaayi ku Diiyiisha dibènesha, dyà kale edi kaaba aka. Nwènù, mpindyewu ndi muswè bwà nùmanyè cyòci aci. Eci ncikwàta pa mikàbà yà mèyi, vùlukàayi, Diiyiisha edi. Ne dikwàtà dyà mikàbà yà mèyi dyà mu èkèleeziyà, mèyi matùma ne tunungu byà èkèleeziyà, mbikwàta pa mikàbà yà mèyi. Aci mbilondèshilè Bible. Kí ntwètù bàdi bàmulombolà to; kakwèna muntu nànsha umwe kumpàlà nànsha. To. Bónsò, tudi bónsò mwòmumwè. Kàdi, tudi ne mulombodi, ki mpaasàtà, pàdiye mulombodìbwe kùdi Nyumà Mwímpè. Bulelèlè's. Èyo.

²⁹⁴ Mpindyewu, mu byòbi ebi, nemwikalè nkonko bùngì cyanààna. Pa nànkù musangu wàlonà wàmanyishàbo, ne Mwanèètù Neville wàmba ku tudyòmà ne nèngiikalè kaaba

aka, ùfunde lukonko lwèbè, bwà mèmè ne wèwè twamòna mwà kukòkanganapù bònso. Mmwòmò nànsha? Èyo.

²⁹⁵ Ndi mumanyè ne nkàadi mulongèshe pa disuminyina dyà bansantu. Nkàadi mulongèshe pa Bunzambi butámbe kutumbuka bwà Yesù. Nkàadi mulongèshe pa dikùbiibwa dyà mwena kwitabuuja, ne didyànjila-kutéekiibwa mu mudimu, ne didyànjila-kulongolola, ne byàbúngi byà ku bintu abi. Pààbi, ndi mumanyè ne, mu disangisha dyànyi mùdi beena ne ànu mikenji bààbúngì, biinè abi biikàlè ànu bilenga byà menemene. Kakùyì mpatà to. Kàdi, mpindyewu, bintu abi, mèmè ntu pàànyi mwena ne ànu mikenji, ne ntu Calviniste. Mèmè ntu ngiitabuuja ànu Bible. Kwàjiki.

²⁹⁶ Mpindyewu, piikalàbi ne, yimwè yà ku yòyi nkonko ayi. Kàdi nkàadi mulongèshe pa bileeji, masaluka, ne bikwàbò, ne bintu byònsò binùdi bafwànyine kupanganangana naabi abi. Pa nànkú dimwè dyà ku malòòlò aa, pàmwàpa, twàmbè ne. . .

Wèwè udi mutámbe kulwijakaja bwà kwalukila mu cyambilu emu anyi? [Mwanèètù Neville ùdi wàmba ne: “Bwàlà.”—Muf.]

Tücyènzàayi mu diisátù dilòòlò, mu diisátù dilwalwà edi diòòlò, díbà adi ndi—ndi ngeela meeji ne ndi—ndi mwà kucyàngata díbà adi. Úlwe ne lukonko lwèbè mu diisátù dilòòlò, ùlútèèkè pa cibumbà cyà ku cyambilu apa, lwikalè lukonko lwà lùtàngila Bible, èyo, lwà pa bìndi mulongèshe mpindyewu ebi. Nènkú mmu diisátù diòòlò. Ne pashìishe patwàmba kufika mu dyàlumingu dyàlondà, díbà adi, ngeela meeji ne nebikengelè bwà ngii—ngiikalè mu Chicago, nànsha bishi. Ne nèngùumukèmu nye mu Michigan. Bu Mukalenge mwà kwanyisha, nèngiikalè kaaba aka mu diisátù dilòòlò, bwà kuteeta bwà kwandamuna ne mwànyi mwònsò ku lukonko alu. Nènkú mpindyewu Mukalenge ikalèku ne luse.

Mpindyewu twìnyikàayaaku mitù yètù, bwà katanci kakesè cyanààna.

²⁹⁷ Mpindyewu, Mukalenge mubènèshìibwe, eci ncibùcilu Cyèbè cinène. Ng'èkèleeziyà Webè. Ng'Wèwè, Mukalenge, udi munkaci mwà kukwàta mudimu, ne twètù tudi baswè kuya mùdi Nyumà wa Nzambi útúsàka amu. Nènkú tudi tulòmba mpindyewu bwà Wèwè kutùbènèsha. Nènkú patùdi twambulula Diyiisha edi, ne tubwela mu bintu byà ndòndò ebi apa, tudi tulòmba bwà Nyumà Mwìmpè àtùbuulwilèbi bilondèshile ànu mutùdi naabi dijinga amu. Bwalu tudi tulòmba nùnkú mu Dìnà Dyèndè. Amen.

²⁹⁸ Mpindyewu, kaa, ndi...Mukàndà wà Ebèlù ewu, ndi ngwàngata ne mushinga bu wùmwè wà ku Mikàndà yà minène.

²⁹⁹ Pashìishe ndambù, bìdi mwà kwenzeka ne ngii—ngiikalè ne...ne cyà kuya dyàmwàmwà dyà mbù, ciinè aci, mbu Mukalenge mwà kwanyisha, nèncyènzè àbìdi àdi panshì aa. Bikèngela nye ku Áfrikè bilondèshile cikèèna—kumòna kampànda. Ngeela meeji ne ncyàkutuuta dyàkalenga bikole

mu masangisha àànyì to pàndì ncìyì nya ku Àfrikè bwà kuuja cikèèna-kumòna aci. Mpindyewu, díbà adi, pàmwápa míngà misangu neciikalè mu muvù wà bintu bitòloka wùlwalwà ewu.

³⁰⁰ Kàdi munkaci mwà cyòci cikondo aci, ndi muswè kwangata mukwàbò mukàndà mu Mukàndà wà Ebèlù amu, mbwena kwamba ne, nshapità wa 11 wa Ebèlù, ne kushààla bu lumingu lujimà nàнку pa nshapità wa 11 awu, ne kwangata yònsò wa ku ngiikàdilù ayi anyì wa ku bantu abu, ne kupàtula patòòke ngiikàdilù wendè. Nwamònu anyi? “Ku diitabuuja, Nowà,” díbà adi kwangata nsòmbelu wa Nowà. “Ku diitabuuja, Abraham,” díbà adi kwangata nsòmbelu wa Abraham. “Ku diitabuuja, Abèlè,” díbà adi kwangata nsòmbelu wa Abèlè. Nwamònu anyi? Ne kuya naabì too ne ku ndekeelu. Nudikù bafwànyine kunanga aci anyi? [Disangisha didì dyàmba ne: “Amen.”—Muf.] Kaa, aci ncifwànyine kwenzeka ne, twèndakanè mu Bible mujimà díbà adi’s. Nèнку díbà adi netùteetè cyòci aci, pàmwápa, anyi mu, twàmbè ne, masangisha a lumingu lujimà anyì matùkù dikùmi, ànu disangisha òmwè paanyimà pàà dikwàbò, byenzè bu mu ditàbuluwa nàнку, cikondo kampàndà cyà mu diikisha dyà Noël amu, anyì cintu cyà mùshindù awu, bu Mukalenge mwà kwanyisha.

³⁰¹ Mpindyewu, mu nshapità wa 7 wa Mukàndà wà Ebèlù, tuvwa batwilàngàne ne Muntu munènè ewu. Nganyì udikù mwà kungambila ne dína Dyèndè ùvwa nganyì? [Disangisha didì dyàmba ne: “Melekisedekè.”—Muf.] Melekisedekè. Mpindyewu, Melekisedekè ewu ùvwa Nganyì? Ùvwa mwakwidi wa Nzambi Mutàmbe bunènè wa mu Dyulu. Ùvwa Mfùmù wa Salèmà, mbwena kwamba ne Mfùmù wa Yelusàlèmà. Kàvwa ne taatù, anyì Kàvwa ne maamù to. Kàvwakù ne cikondo ciwàYekù mulediibwe, anyì Kààdyàkwikalakù ne cikondo cyà ne Yèyè neáfwe to. Mpindyewu, tudi tujandula ne awu ùvwa ne cyà kwikala wa Cyendèlèlèlè.

³⁰² Tudi bajandùle ne mwakù *kashidi* mbwena kwamba ne “cipòòlò cyà cikondo.” Nucidi bavùlùke nàнку anyi? Cipòòlò cyà cikondo, mbwena kwamba ne kashidi ne kashidi. Ne *kashidi* mmujaadikiibwe, misangu yàbùngì, mu Bible bu “ci—cipòòlò cyà cikondo.”

³⁰³ Kàdi, Cyendèlèlèlè, ne kùdi mùshindù wà Mwoyi wà Cyendèlèlèlè ànu wùmwèpelè, mutùdi basangàne. Mmwòmù anyi? Nzambi ngudi ne Mwoyi wà Cyendèlèlè awu, nkààyèndè. Mmwòmù anyi? Mùshindù ànu wùmwèpelè wà Mwoyi wà Cyendèlèlèlè. Mwakù pààwù ne “Dinyooka dyà Cyendèlèlèlè” kawùtukù to. Bwalu, wèwè ne cyà kunyookiibwa bwà Cyendèlèlèlè, s’bikèngela wikalè ne Mwoyi wà Cyendèlèlèlè bwà wèwè kunyookiibwa Cyendèlèlèlè. Bìvwa bikèngela wikalè ne Cyendèlèlèlè. . . . Ne wèwè ne Mwoyi wà Cyendèlèlèlè, kwèna mwà kunyookiibwa to, nwamònu’s, wèwè ne wà Cyendèlèlèlè. “Ewu udi umvwa Mèyì Àànyì, ne witabuuja Yèyè udi muNtùme, ùdi

ne Mwoyi wà kashidi.” Mmwômù anyi? Mwoyi wà Cyendèlèlè, mbwalu udi witabuuja. Èè, wèwè ne Mwoyi wà Cyendèlèlè, kwèna mwà kunyookiibwa nànsha, bwalu udi ne Mwoyi wà *Cyendèlèlè*. Pa nànkù, díbà adi, wèwè mwà kukènga mu ifernò kashidi ne kashidi, s’bikèngela wikalè ne Mwoyi wà Cyendèlèlè.

³⁰⁴ Kàdi, mpindyewu, ndi cyà bushùwà ngiitabuuja ne Bible ùdi ùlongesha ifernò ànu wetù wa ùlàkuka kapyà ewu. Bible ùdi ùlongesha ne, ne mpèkaatù ne lwonji nebinyookiibwè, kashidi ne kashidi. Mpindyewu, aci kí n’Cyendèlèlè to. Aci cidi pàmwàpa mwà kwikala bwà bidimu miliyaalà dikùmi. Cidi mwà kwikala bwà bidimu miliyaalà lukàmà, kàdi mûngà musangu cidi ne cyà kwikala ne ndekeelu. Bwalu, cyònsò civwàku ne ntwàdijilu, cidi ne ndekeelu. Bintu bìdi kabiyi ne ntwàdijilu, mbidì kabiyi ne ndekeelu to.

³⁰⁵ Nwavùluku mpindyewu dileesònà adi anyi? Mutùvwà baalùkile basangàne ne cyònsò civwà ne ntwàdijilu cyàkanyangakajiibwa, nwamònu’s, dinyangakajiibwa dyà ku cidi cyà mushinga. Kàdi, ndekeelu wa byònsò, cidi cyàlukila cikooobeka ku Cyendèlèlè. Ne pashiishe ifernò yònsò, dikèngà dyònsò, ne civùlukilu cyònsò cyà byà nànkù awu aci, nebìjiminè Cyendèlèlè. Cintu cyònsò cyàkabangà aci, necifikè ku ndekeelu.

³⁰⁶ Nènku Melekisedekè ewu kàvwa Yesù to, bwalu Yèyè ùvwa Nzambì. Ne civwà cyènza ne Yesù ne Nzambì bìikalè bashiilàngàne, civwa ne, Yesù ùvwa Ntentà uvwa Nzambì musòmbèlemù. Nwamònu anyi? Mpindyewu, Melekisedekè. Yesù ùvwa ne taatù ne maamù bònsò bàbidì. Kàdi ewu Muntu Yèyè kàvwakù ne taatù anyi ne maamù to. Yesu ùvwa ne ntwàdijilu wa mwoyi ne Ùvwa ne ndekeelu wa mwoyi. Ewu Muntu Yèyè kàvwa ne taatù, ní mmaamù, ní nntwàdijilu wa matùkù anyi ndekeelu wa mwoyi to. Kàdi, Ùvwa m’Mupersona umwèumwè awu. Civwa ne, Melekisedekè ne Yesù bàvwa Umwe; kàdi Yesù ùvwa mmubidi wà pa buloba, mulela ne mulongolola mu cimfwànyì cyà mpèkaatù. Mubidi Sungasunga wà Nzambì, Mwan’Èndè sungasunga, mulela ne mulongolola mu cimfwànyì cyà mpèkaatù, bwà kunyènga lufù kalonda, bwà kufuta mushinga wà bupikudi, ne bwà kuDipetela Yèyè mwinè bânà bàà balùme ne bàà bakàjì. Nwacyùmvù anyi? Ki bwà cinyì Ùvwa—Ùvwa ne ntwàdijilu, Ùvwa ne ndekeelu.

³⁰⁷ Kàdi mubidi mupwàngàne ewu, mu civùlukilu aci, bu—bu cyeyà cyà dibìshiiibwa dyètù dyà ku lufù, Nzambì kàvwakù mufwànyine kwitaba bwà mubidi wà cijila awu ùmònè dibola to, bwalu Wàkawùfùka Yèyè mwinè. Ki kuwùpàtula, ne kuwùbiiisha ku lufù, ne kuwùsòmbesha ku dyàbalùmè Dyèndè.

³⁰⁸ Nènku, leelù ewu, Nyumà Mwímpè wàkabiisha mubidi awu ku lufù awu ùdi kaaba aka mu Èkéleeziyà. Dìnà dyà Mukalenge dibeneshiiibwè! Ne mwikàle ùleēja bishimà ne

bukolè bimwèbimwè abi. Ne dīngà ditùkù Nyumà Mwímpè, udi mu Èkèleeziyà ewu, neèlè lubilà lukolè ne neàbandè, ne neàdyàkidilè yèyè mwinè mu mmwènekèlu wa mubidi wùdi musòmbe ku dyàbalùmè dyà Nzambi Mutàmbe bunènè ewu, bwà kutwàkwilawù twètù bangènzàmpèkàatù. Ne Kwòkù aku tudi balamiibwe mu bupwàngàne bwònsò ku mpèkàatù. Kí nnè katwèna twenza mpèkàatù to; kàdi balamiibwe ku mpèkàatù, mu Bwikadi bwà Nzambi. Bwalu, kùdi mulàmbù wà Mashì wùsanganyiibwa pankaci pàanyi ne Nzambi, pankaci pèèbè ne Nzambi. Ki bwà cinyi Yèyè wàkamba ne: “Muntu udi mulediibwe kùdi Nzambi, kènà wènza mpèkàatù to, kènà mwà kwenza mpèkàatù to.” Bwalu, wèwè mulediibwe cyàkàbìdì, Nyumà Mwímpè mene uvwa musòmbèle mu Mubidi awu awu mmusòmbèle munda mwèbè. Ne kaWènà mwà kwenza mpèkàatù to; mulàmbù wùdi wùsanganyiibwa kumpalà Kwèndè. Dìbà adì wèwè mucyènzè ku bukòlè, bìdi bileeja ne kabyèna mwà kwenzekakù to bwà wèwè kwikala mu Mubidi awu. Amen. Ki Èvànjeeliyò nyawù. Ki Yèyè awu.

³⁰⁹ Ki bwà cinyi, nudi numòna's, kaCyèna cyàmbakù bibèngàngàne ne nànsha wùmwe wà ku Mifundu to. Cidi cìswikakaja Mifundu pàmwe. Nwamònu anyi? “Kí mbifwànyine kwenzekakù to bwà aba bàkaavwà bamana kukenkeshila musangu kampànda.” Ki mwaba wutwàpetelà nkonko yànyì ngwòwù awu. Bwalu, yàngàtaayi ànu cyanààna, mùshindù awu ki wutùdi baswè.

³¹⁰ Mònaayi mpindyewu. “Kabyèna mwà kwenzekakù to bwà aba bàkaavwà bamana kukenkeshila musangu kampànda, bwà kudishindabò bwà kudyàlujululabò cyàkàbìdì ku kanyinganyinga, pa kumòna ne bóbò bàdi bàpoopela cyàkàbìdì Mwànà wa Nzambi pa nkùruse, ne bàMuvwija. . . ne bàMufila ku bundù bwà patòòke.” Bóbò kí mbafwànyine kucyènzakù to.

³¹¹ Pashiishe nuyààya ku Ebèlù 10, kùdiCi cyàmba mwaba awu ne: “Bwalu twètù twenza mpèkàatù ku bukòlè paanyimà pàà bamanè kupeta dimanya dyà Bulelèlè.” Nènku mpèkàatù ncinyi? Bupidyà.

³¹² Wèwè udìmwèna Nyumà Mwímpè wènza bintu byènjìYe mu dindà emu mene abi, ne umòna ne Kilistò mmubiike ku bafwè, ne Ùdi ne mwoyi mu Èkèleeziyà Wendè ne munkaci mwà bantu Bèndè, kàdi uMubènga ku bukòlè, kabyèna mwà kwenzekakù to bwà wèwè kufika kùdi Nzambi, bwalu wàpendi Nyumà Mwímpè.

³¹³ Yesù wàkamba bintu bimwèbimwè abi, pàvwàYe wènza byòbì bishimà abi.

³¹⁴ Kwambabò ne: “Mòna's, Yèyè's m'Beelèzèbùlà. Mmwena lubùkù. Ndyabùlù.”

³¹⁵ Yesù wàkakùdimuka, kwamba ne: “Bwà aci Nènnùfwilè luse. Kàdi pàalwà Nyumà Mwímpè kucyèenza, kuMwamba dìyi dìbi

kakwàkufwidiibwakù luse nànsha ní mmu cikondo eci ní mmu cikondo cicilwalwà.” Bwalu nudi babiikile Nyumà wa Nzambi uwa munda Mwèndè awu ne, “nyuma wa bukooyà.”

³¹⁶ Dìbà adi, twètù twenza mpèkaatù ku bukolè, twètù twenza mpèkaatù, tubènga kwitabuuja ku bukolè. Kî mpaanyimà pàà bamanè kupeta Bulelèlâ, balediibwe cyàkàbìdì to; katwèna bafwànyine kwenza mpèkaatù dìbà adi nànsha. Ngènzàmpèkàatù kèna mwà kwenza mpèkaatù wa kàyì mwà kufwidi-... Mwena Kilistò kèna mwà kwenza mpèkaatù wa kàyì mwà kufwidiibwa luse to. Yèyè kèna mwà kumwenza to. Ewu udi kàyì ùneemeka Nzambi ngudi umwenza. Mmwena kwitabuuja wa budìngìbudìngì, kî mmwena kwitabuuja to.

³¹⁷ Baalaabi bàà beena Yudà abu, kaa, bàvwa bàdyàmbidila mùvwàbo buumàkàne, ne mùvwàbo ne màpòlomè a D.D. ne a Ph.D. Bàvwa bàdyàmbidila mùvwàbo bòbò ne byònsò bilongolola, mu mufuku, kàdi pààbò biikàle bangènzàmpèkàatù bàà babi ku bònsò. Kaa, bàvwa bafwànyine... Kùvwakù mwà kufunkuna kantu kabì pa—pa wabò nsòmbelu bòbò to. Bàvwa bakezùke, bàà maalù mimpè mu nsòmbelu, ne baakàne, mùshindù awu. Kàdi bàvwa beena bupidyà.

³¹⁸ Kàdi angàtaayi mwakù ewu mpèkaatù nùsangananè cidìwu wùmvwija. Mwakù ewu *mpèkaatù* wùdi wùmvwija “bupidyà.” Kùdi bitùpà ànu bìbìdì, ki, mwena kwitabuuja anyì mwena bupidyà. Mbwenà kwamba ne, muntu mubingìshìibwe anyì ngènzàmpèkàatù. Kwàjikì. Wèwè mwikàle mwena bupidyà, udi ngènzàmpèkàatù; nànsha wèwè mwikàle mwimpè wa bishi, nànsha wèwè uya mu èkèleeziyà bìshi, anyì nànsha mene mwikàle muyiishi. Ucìdì ànu mwena bupidyà.

³¹⁹ Bàfaalèsà abu’s bàvwa bayiishi, kàdi bàvwa beena bupidyà, ne bàdi mu ifèrnò leelù ewu bwà cyòci aci. Ànu batèndeledi ne mwàbò mwònsò, ne bàà kaneemu kakolè bwà ntèndeleele, kàdi kabààkaMwitabuuja to. Ne bààkaMubiikila ne “démon,” ne bààkeela Dìyì Dyèndè mpatà. Ne bàmwè bàà kùdìbo bàkamba ne: “Ní ngwèwè, mpindyewu tùulukaàku ku nkùrusè aku tũng. Enzàbi cishimà tũng. Cyènzèbi tũng tùmonè.” Umwe kuMutuutayè cintu ku mutù, ne citùpà cyà mucì, wàmba ne: “Enzàbi cipròfetà tũng ùtwàmbilè ne wákutuutù awu nganyì, wèwè mupròfetà ewu, nènku netùkwitàbùùjè.” Nwamònu’s, beena bupidyà! Bàvwa bàdingìdija mùvwàbo beena kwitabuuja, pààbò beena bupidyà, bantu kabàyi bafùkùlùdiibwe, batàpulula to, nànsha mùvwàbo bàà cijila ne bàà kaneemu kakolè bwà ntèndeleele amu.

³²⁰ Kàdi, ncintu cìmwècìmwè aci citùngùnùke leelù ewu. Balùme ne bakàji bàdi mwà kuya mu èkèleeziyà ne kwisù kwà bunsantu, ne—ne biikàle bàà kaneemu kakolè bwà ntèndeleele ne mwàbò mwònsò, ne kabàyikù bàshima, kabàyikù bìiba to, kàdi bàteeta kwikala ne nsòmbelu wa ntèndeleele wabò awu bilenga ne mwàbò mwònsò. Kàdi, bòbò kabàyi beena kwitabuuja

to, mbajimine. Pa nàнку kakwènakù kaaba kàà upeta beena ne ànu mikenji mu Bible to. Calvinisme ùdi. . . Ngàsà ncidì Nzambì mukwenzèle, ne byenzedi ncyùdi wèwè wenza bwà Nzambì. Mbishiilàngane byà kakùyì mpatà to.

321 Wèwè mulekèle kushima, mulekèle kunwà kwà mfwankà, mulekèle kwiba, mulekèle kwenda kwà masandi, mulekèle byònsò, mwenzè byònsò, mulamè mikenji, ne muyè mu èkèleeziyà, mubàtìijìibwe mu dyàlumingu ne dyàlumingu dyònsò, mudyè mèèsà a Mukalenge, mwowèshe bansantu màyi ku makàsà, mwenzè byònsò, mwondòpe babèèdi, ne mwenzè bintu bikwàbò byònsò ebi, wèwè kùyì mulediibwe kùdi Nyumà wa Nzambi, musungidiibwe to, udi mujimine. “Kì ng’ewu udi muswè anyì ewu udi unyeema lubilu to, kàdi n’Nzambì udi uleeja luse.”

322 Esawù wàkateeta ne mwèndè mwònsò bwà kwikalayè mwena Kilistò, kàdi kàyikù mwà kukumbana to. Bible mmwambè ne yèyè wàkadila bujindajinda, ùkèba mwaba wà yèyè kunyingaleela, kàdi kàvwakù mwà kuwùpeta to. Kumpàla mene kwà kulediibwayè, Nzambi ùkaavwa mumupishe, bwalu Ùvwa mumanyè ne ùvwa mwenji wa maalu makònyàngàle mubolè mu mwoyi wèndè. Nzambi ku didyànjlila-kumanya ùkaavwa mucimanyè. Wàkamba ne: “Ndi munangè Yakòbò, ne mukine Esawù.” Ne Esawù’s ùvwa mumwèke muntu mukàlàngà. Ùvwa ùshààla kumbèlu, ùkùba tatwèndè mpofo mukùlàkàji awu, ùdiisha bimunà, ne bikwàbò byònsò, mwikàle mwànà wa balùme mwimpè.

323 Kàdi Yakòbò ùvwa mwànà wa balùmè wa maman, kaacilùmaacikàji keena mafi aku. Aci’s ki civwàye yèyè. Bikèngela nucitàbè. Bible mmucitàbè, ùcileeja. Ùvwa unyeemakanangana eku ne eku, wèza bintu byònsò. Ne—ne, maman, kàcya wàlamatangana ànu ne maman. Kàdi, nànsha nàнку, Yakòbò, ne mabika ne mala ònsò àvwàye naawù awu, ne mishindù yèndè yà buucilùmaacikàji ayi, ùvwa ànu mutwè bwanààbutè abu mushinga. Ki cyà mushinga ncyaci.

324 Esawù ùvwa mutàmbe Yakòbò misangu yìbidì ku diikala muntu mukàlàngà. Bu ne bìvwa bikèngela bwà twètù kumulumbulwisha leelù ewu, yèyè bu cidimba cyà èkèleeziyà, wèwè’s uvwa mufwànyine kwangata Esawù, cinunu kwà kàmwè, wèwè kùyì mumumanyè. Kàdi Nzambì Yèyè wàkangata Yakòbò.

325 Wèwè uvwakù mufwànyine kwenza cinyi ne Pòlò Munsantu, bu yèyè muswè kwikala mwambi? Keena Yudà kakesè, kàà dyùlù dikònyàngàle, ne mukana musendàme luseke, kènda ànu kàkòkangana ne bantu, ne mùvwàku ne cyà kasaasulula Èkèleeziyà, mùvwàku ne cyà kwenza bintu byònsò abi. Wèwè’s uvwa mufwànyine kwela meeji ne mmwenzè mpèkaatù udi kàyì mwà kufwidiibwa luse, kàdi Nzambì Yèyè wàkamba ne: “Mmusadidi Wanyi.”

³²⁶ Nzambi ngutu wàngata bantu ùbàvwija bashiilàngàne, kí mbantu bàngata Nzambi bàlwa bashiilàngàne to. Nzambi ngutu wàngata muntu ùmuvwija mushiilàngàne. Kí ncyûdi wêwê wenza, cyûdi wêwê muswê, cyûdi wêwê wela meeji aci to. Ncidi Nzambi Yêyê wenza. Ki bwalu mbwôbù abu's. Ne ki bwalu-bulonda mbwôbù abu.

³²⁷ Mpindiyewu, Melekisedekè munène ewu, bwalu kaayi bulonda Bwèndè Yêyê kaaba aka's wè! Tudi baswè kubalakù ndambù, ànu mu mùshindù kampàndà wà. . . bivwà bitùkèngela kubitèèla lùkàsàlùkàsà. Netùbangilè lwà apa pa citùpà kampàndà cyà Mufùndu, nènku netùbangilè lwà ku mvensà wa 15.

Ne bicidi. . . bitàmbe kumwèka ne kùdi. . . bwà ne mu difwànangana dyà ne Melekisedekè kùdi kùjuuka mukwàbò mwakwidi.

³²⁸ Mpindiyewu, Melekisedekè ùvwa Mwakwidi. Ncìvwà Ye anyi? Cìvwà Ye ncyôci eci. Tudi tusangana ne Nzambi, ku cibangidilu, ùvwa mpokolo munène wa Nyumà. Ncyà bushùwà anyi? Kàvwa ne mwaba wà ciledi to. Kàvwa ne mwaba wà difwila to. Kàvwa ne ntwàdijilu wa matùkù to. Kàvwa ne ndekeelu wa bidimu to. Yêyê ùvwa wa Cyendèlèlè ànu mùdi Cyendèlèlè ciikàle cyà Cyendèlèlè amu. Kàvwakù mulediùbwe to. Kààkafwàku to.

³²⁹ Nènku mwômò amu, tudi tusanganamù ne, Yêyê ùvwa ne mishindù mwandamutekète yà Nyumà. Mmwômò anyi? Bible mmwambè, mu Bwàkabuulwibwà, ne: "Nyumà mwandamutekète kumpàla kwà Nkwasa wa butùmbi wa Nzambi." Mmwômò anyi? Mwandamutekète, mishiilàngàne, Nyumà mwandamutekète. Tudi tusangana ne, kùdi meekala mwandamutekète. Kùdi bikondo byà èkèleeziyà mwandamutekète mwômò amu. Kaa, bìdi biswikakana. Mwandamutekète mmukùmbànàngàne, ne Nzambi ùvwa mmukùmbànàngàne. Ne Nyumà mwandamutekète, ne Nyumà ayi yivwa mipwàngàne. Dyà kumpàla divwa ndiikala dyà dikunze; dinanga dipwàngàne, bupikudi. Ne mùshindù mwinè's, bu ne tuvwakù ne díbà, dyà kufila meekala awu ne kuleeja ne dyònsò dyà ku meekala awu didi dileeja bukezùkè bwà Nzambi's. Amen. Meekala awu, kùdi meekala a mu bufùki mwandamutekète. Meekala awu àdi àleeja bukezùkè bwà Nzambi. Nènku. . . Meekala awu àdi àleeja tubingilà twà Nzambi, lwidi lwà Nzambi. Meekala mwandamutekète awu, àdi àleeja bikondo mwandamutekète byà èkèleeziyà, mitootò mwandamutekète, banjèlò mwandamutekète. Mu Mifùndu yònsò, bambi mwandamutekète, baamisànjeelà mwandamutekète, mikenji mwandamutekète, byònsò mu mwandamutekète mwandamutekète. Matùkù mwandamutekète. Matùkù àsambòmbò, ne dyà mwandamutekète ki nsabatu; bipwàngàne, bikùmbànàngàne. Kaa, mbilenga, bu ne tuvwakù

ànu ne díbà dyà kukèbululamù ne kubipàtula, miinè meekala awu!

³³⁰ Angàtaayi diikala dikünze. Tudi twangata diikala dyà kumpàla, ndikünze. Dikünze ncinyi? Dikünze ncimanyinu kampànda cyà njìwù. Díkünze ncimanyinu cyà bupikudi. Nènku tàngidilà dikünze mu dikünze, dìdi ndiikala kaayi? Ditòòke. Aci mmwómò. Nènku pààkeedibwà Mashi makünze panshi, bwà kubwikila mpèkaatù mukünze, Nzambi, mu kutàngidila mu Mashi makünze, ùtàngila mpèkaatù mukünze, ùdi ùlwa mutòòke. Mwena kwitabuuja kèna mwà kwenza mpèkaatù to. Nànsha kakesè. Dimiinu dyà Nzambi, mabènesha a Nzambi, àdi àshààla pambidi pèndè. Nzambi kèna mwà kumòna cintu nànsha cìmwè to pa kuumusha Mashi a Mwan'Èndè Sungasunga awu. Cidì mu Èkèleeziyà Wendè nànsha ciikàle cinyi, cidici aci, Nzambi kèna ùcimòna to, bwalu Yesù ùdi munkaci mwà kwenza dyakwilangana, díbà dyònsò, Mwakwidi Munèna awu. Kakwènakù mùshindù wà kwenzayè mpèkaatù to, pàdi Mulàmbù wà mùshindù awu wùsanganyiibwa mwab'awu bwèndè yèyè, mùshindù awu. Nànsha kakesè.

³³¹ Kàdi mpindyewu wèwè mwambè ne: “Èè, aci's cidi cimpèesha mpùngà mwìmpè. . .” Díbà adi aci cidi cileeja ne kwèna mujaalàme to.

³³² S'newànyishè Cyòci aci. NeùCinangè, pawìkalà mwena Kilstò mulelèlè, mu mùshindù wà ne mpèkaatù mmufwànyine kulumbatangaana neebè pèebè kùyi mufwànyine kumwenza to. “Bwalu Dimiinu dyà Nzambi didi dishààla munda mwèndè, ne yèyè kèna mwà kwenza mpèkaatù to.” Bible mmwambè ne: “Pàdiye ànu ne wàkezùdiibù ku Mashi a Yesù, yèyè kacyèna kabidi ne dijinga dyà mpèkaatù to.” Wèwè ne dijinga, mwoyi wèbè kí mmujaalàme kumpàla kwà Nzambi to.

³³³ Mpindyewu, newènzè cintu cibi, kàdi kwèna ucyènza ku bukòlè to. Nwamònu anyi? Udi—udi mupìike mu butèyi, ne cyònsò cyùdi mupìikile mu butèyi aci, anyi wenza cintu kampànda cyùdi kùyi mwelè meeji a kucyènza, kí ncyanjì kwikala mpèkaatù to, neùnyingalalè pa kasuna mene kaùdi umòna ne udi mutùpàkàne aku. Neùkudimukè ne lùkàsà lwònsò wamba ne: “Ncìvwa ne meeji. . . ncìvwa mumòne aci to.” Ki ciwàmba, matùkù èbè ònsò a mwoyi. Muntu udi kàyi muswè kwikala nànkù, ki bwà cinyi tudi bakùtākàne bikòlè ne tutàmba kusanganyiibwa mu mídima, panshi pa buloba apa, apu mpàdiku difuta dyà cibawu dyà Mashi bwètù twètù, díbà dyònsò, bwà kutùlama babwikila. Mbwalu, cilèma cyà kumpàla citùdi batwilàngàne naaci. . .

³³⁴ Mpindyewu, ki mmwènenenu wenù nwènù beena ne ànu mikenji nyèyè awu. “Kà, udi mumanyè mùdi bwalu anyi? Mukàji awu ùvwa mujidiibwe. Kàdi, Nzambi àbeneshiibwè, wènjì cilèma. Ndi mumanyè ne mmutwè cimpingà.” Aci ndishima. Kí

mmutwè cìmpìngà nànsha. Mmwenzè cilèma. Yèyè mucyènzè ku bukòlè, dîbà adi kàvwa mujaalàme to, ànu kwìnè kwònsò aku.

335 Pìikalàbi ne kàvwa ne meeji a kucyènza to, ne ùpita kumpàlà kwà Èkèleeziyà wa cijila na Nzambì ne ùcìtonda, wàmba ne: “Ndi mupìlle, nènku mfwilaayikù luse,” nudi benzèjìibwa bwà kucyènza. Pawikalà kùyi ucyènza munda mwà mwoyi wèbè to, dîbà adi bìvwa bikèngela bwà wèwè mwinè kuya ku cyòshelu. Bulelèlà. Ki cijila cilelèlà mu èkèleeziyà ncyòci aci. Ki cijila cishùwashùwàlè ncyòci aci, cijila cidì kaciyi cyà kùdi wèwè to, kàdi cyà kùdi Kilistò.

336 Mèmè ncyèna ne cijila cyà kuMuleeja to. Kàdi ndi ngeeyemena Cyèndè Yèyè, kaa, ngàsà Wendè, ne ndi nendè munda mwà mwoyi wànyì. Ncyèna mucikumbànyine to, kakwèna cintu nànsha cìmwè cìndi mufwànyine kwenza bwà kucikumbanyina to, kàdi ku ngàsà nkùdiYe mumbiikile ne muntùmine dibìikila dyà kulwa. Ki mèmè kutàngila kùdiYe, ne Yèyè kuumusha dijinga adi mu mèmè. Ntu ngenza binunu byà bilèma mu ngondo yònsò emu, ku cidimu cyònsò eku. Cyà bushùwà, ntu mbyènza. Kàdi pàndi mmòna ne ndi mupìlle, ndi ngamba ne: “Nzambì, ncìvwa ne meeji a kucyènza to, Wèwè udi mumanyè mwoyi wànyì. Ncìvwa ne meeji a kwenza bwalu abu to. Mvwa mupìlke mu butèyi abu. Ncìvwa ne meeji a kucyènza to. Mfwilèku luse, Mukalenge.”

337 Mèmè mwenzèle mwanètù bibì, ndi ngamba ne: “Mwanètù, mfwilèku luse. Ncìvwa ne meeji a kwenza nànkù to. Cyà bushùwà, Nzambì mmumanyè mwoyi wànyì.”

338 Kaa, s’ki bwalu mbwòbù abu. Ki mulambù wà Mashì ngwòwò awu. Ki bukòlè bwà Èvànjeeliyò mbwòbù abu, Èkèleeziyà wa cijila awu mwikàle ùtùngunuka ne diya. Kaciyi ne mbwà cintu kampànda cyùdi wèwè mwenzè to; ncintu cyùvwàku wèwè kuyi ne cyà dyanzàmù nànsha cìmwè to. Ki Difuta dyà cibawu ndyòdi adi.

339 Mpindyewu, Melekisedekè ewu, pàakapàtukàYe apu.

340 Ndi muswè nnwàmbilèku cikwàbò cintu. Nukààdikù bangàte ci—cipese cyà lumwènù cyà nseke yisàtù anyi? Angàtà cipese cyà lumwènù ciikàle ne nseke yisàtù, ne ùcìtèèkè mu mùshindù wà dîbà dicitwa nsèsà, necipatulè meekala mapwàngàne mwandamutekète. Cipese cyà lumwènù cyà nseke yisàtù aci necipatulè mwanzankòngòlò. Ncyà bushùwà menemene. Mpindyewu, bu ne tuvwakù ne dîbà, tuvwa kubwelamù pa cyòci aci. Isàtù yidi yifila bupwàngàne: Taatù, Mwànà, Nyumà Mwìmpè; dibingishiibwa, dijidiibwa, dibàtiiza dyà Nyumà Mwìmpè. Ki bwalu mbwabù’s. Bupwàngàne bùdi bùfùmina ku isàtù. Nzambì, kumutù kwà muntu; Nzambì, munda mwà Muntu uvwa ubiikidiibwa ne n’Yesù; Nzambì, mu Èkèleeziyà. Dîbà adi, bupwàngàne.

341 Muntu ùvwa wènzà mpèkaatù, bu mùvwà Nzambi kuulu *eku* mu Dikunji dyà Kapyà. Nzambi...Muntu's wè, ùvwa wènzà mpèkaatù, kumpalà kwà Nzambi, bu mùvwà Nzambi mu Dikunji dyà Kapyà, bwalu ùcivwa ànu cifùkiibwà cikooyike, mashi a nyama matèeka kumpalà Kwèndè.

342 Pashiishe Mwànà wa mùkòòkò wà Nzambi kulwaYè, cidya ciibìdì cishindàme cyà Nzambi; Nzambi umwèumwè awu, mudimu mukwàbò. Nènku dîbà adi Nzambi ewu mu...uvwa munda mwà Kilistò awu, ùvwa Nzambi umwèumwè uvwa mu Dikunji dyà Kapyà awu. Nènku Nzambi umwèumwè awu wàkavwijiibwa mubidi ne wàkasòmbela munkaci mwètù. Ki dîbà adi muntu kuMwelulwilayè, cìcìvwà ànu cyà kabàyi bàmbadila to. Kakùvwa kwanji kwikala Mashi meela panshi to. Ncyà bushùwà. Yesù wàkamba ne: "Nènnùfwilè luse."

343 Kàdi pashiishe Yéyè umwèumwè uvwa mubidi awu, wàkalwa cyàkàbìdì mu Dikunji dyà Kapyà. "Ndi mufùme ku Nzambi, Ndi nya ku Nzambi." Apa nyewù tusangana Pòlò ùtwilangana Nèndè, mu njila mutàngile ku Damàsèkè, Dikunji dyà Kapyà òmwèdimwè adi. Tudi tusangana Peetèlò ùtwilangana Nèndè mu bùlokò, Dikunji dyà Kapyà òmwèdimwè adi. Cyà bushùwà's. Ne nyewù tuMumòna leelù ewu, munkaci mwètù, Dikunji dyà Kapyà òmwèdimwè adi.

344 Kàdi bupwàngàne mbufikè mu mùshindù wà ne, Mupersona wa munkaci awu...Mpindyewu, byòbì byenzèke ne kwikalè mwena Yudà kaaba aka, anyi muntu kampànda udi umvwakù Dipungila Dikùlukulu. Bwà kucijaadika, lekèlaayi nnùleejèku. Ncyèna ne Dipungila Dikùlukulu pàndi apa to, mpindyewu mene. Eci cidi—cidi n'Dipungila Dipyadìpyà. Kàdi mu mulàmbù wa màmpà a baakwidi àvwà matèeka pa dilòngò dyà dyàmpà dyà kosher adi, mu mulàmbù wà beena Yudà dîbà dyà kusukula kwà ntentà ya kusambakeena; konkàayi mwena Yudà kanà yònsò ewu; pa bipese bisàtù byà dyàmpà abi, cipese cyà munkaci ncìvwà cìcìbudiibwà. Aci cìvwà n'Kilistò. Cipese cyà munkaci ncìvwà cìcìbudiibwà.; Kilistò, wa pankaci pàà bibìdì awu. Bìvwa bileeja ne bìvwa bikèngela kwikalè dicìbudiibwa, mu mwaba kampànda, bwà bupikudi. Nènku cipese aci cìvwà cyàngaciibwa bu bupikudi, pa dyàmpà dyà kosher adi.

345 Nènku's ki Yéyè ewu. Nènku dilòlò edi, patùdì tudyà mèèsà a Mukalenge, tudi tucibula dyàmpà dyà kosher adi, bwalu didi mmubidi wà Kilistò. Ne Yéyè wàkacìbudiibwa ku Kàlvariyo, bwà kwikalaYè Mulàmbù wà kujimija naawù mpèkaatù yètù, bwà ku bwakànè Bwèndè twamòna mwà kulwa bwakànè Bwèndè. Bwalu, Yéyè wàkalwa mpekaatù wetù, bwà twamòna mwà kulwa bwakànè Bwèndè. Mwanèètù, aci's nngàsà ànu pa yéyè. Kakùyì mpatà to. Kakwènakù mùshindù nànsha wùmwè, mùshindù mukwàbò wà wèwè mufwànyinekù kubingishiibwa to.

346 Mpindyewu, Melekisedekè ewu, Mupersona munène wàkatwilanganabò nendè mu njila ewu, kufutayè, Abraham kuMufutayè byàdiikùmi. Mùshindù mwinè wùvwàYe ne cyà kwikala Muntu munène's wè! Mpindyewu mònaayi, lùkàsàlùkàsà.

*Udi muvwijùbwe, kabiyi bilondòshile mikenji yà . . .
mèyi matùma a musunya to, . . .*

347 Mpindyewu nudi numòna mukènji wa beena ne ànu mikenji awu anyi? Mikenji mmyambè ne: “Kùshebeyanganyi. Kwèndi masandi. Kwìbi.”

348 Yesù kukùdimuka buludì, kwamba ne: “Bààkamba kùdì bàà bikondo byà kale, ne: ‘Kùshebeyanganyi,’ kàdi Mémè ndi ngamba ne ewu yònsò ukáfikidi mwanàabò munda, kakùyi bwalu, wàmanyi kushebeyangana. Bààkamba, kùdì bàà bikondo byà kale, ne: ‘Kwèndi masandi,’ kàdi Mémè ndi nnwàmbila ne, ewu yònsò ukátàngidi muntu mukàji bwà kumwalakana, wàmanyi kwenda nendè masandi munda mwà mwoyi wèndè.” Ki bwalu abu's. Aci's civwa ne cyà kulongesha bantu bakàji mwà kuvwàla bilàmbà, mwà kwenza cidi cijaalàme. Wèwè nyaawù uvwàla bilàmbà mùshindù mubi, ne ufikisha bantu balùme ku dikutàngila mu mùshindù mubi, s'udi mupùile bwà dyenda dyà masandi, byà mwomùmwe ànu ne wèwè mwenzè cyenzenzi ciinè aci. Yesù ngudi mwambè nànkù.

349 Ne nwènù bàdì ne biiji byà bìdya micì ebi abu, bàdì misangu yònsò ànu nulàsula maalu nwamba muntu kampànda, kanùyikù mwà kutwàlangana, ne bikwàbò byà mùshindù awu abi. Wadimuka. Udi mupùile paùdì wamba mwanèènù díyi didì kadiyi dimpè to, kadiyi dijaalàme, uya eku ne eku wenda ubinyanga. Kabyèna ànu bìkèngela bwà wèwè kucimpika muntu keelè mu mwongo bwà kumushebeya to. Udi ànu mwà kunyangakaja ngiikàdilù wèndè bwà kumushebeya, kumunyangila luumu. Kwakula bibì bwà mpaasàtà wenù ewu, kwamba cintu kampànda cyà cibi bwèndè yèyè, bìdi ànu mwomùmwe ne wèwè mumwasè cingoma mwinè. Mwambè cintu kampànda civwà kaciyi cimpè bwèndè, èè, s'necimunyangilè luumu kùdì bantu ne bikwàbò byà mùshindù awu, nènku udi mupùile bwà cyòci aci. Ki cyàkambà Yesù.

350 Mpindyewu, tèelejàayi kùneeku, kùvwà—kùvwà Pòlò ùteeta kafika kaaba aka. Mémè ntu munangè Bible wa kale ewu. Ùdi ùkwololakù's. Tàngilàayi, kaa, tàngilàayi ànu kùneeku. Mpindyewu, patùdì tubala mwinây-. . . “Bìdi . . . bwalu mbimwènèke patòoke ne Mukalenge wetù mmupàtùkile mu Yu-. . .” Indilàayi, ngeela meeji ne ndi ne mvensà mukwàbò kaaba aka ùmvwa muswè kubala. To, kwìnshì ku wa 16 eku.

*Udi muvwijùbwe, kabiyi bilondòshile mikenji yà . . .
mèyi matùma a musunya to, . . .*

351 Aci ncyà beena ne ànu mikenji, nudi numòna's. "Kaa, mwanètù, kabivwa bìn—bìnkèngela nàнку to. Kabivwa bìnkèngela nàнку to. Ndi mumanyè, kàdi ndi . . ." Kí nnàнку to. Dinanga ndìdì dicyènza.

352 Mùshindù mwinè wutùkaadi bacìkenkète's wè! Mwva mwambè ne: "Bu mèmè mwà kwambila wanyì . . .kwamba bwà mukàjàanyi ne: 'Kaa, èè, ndi—ndi—ndi muswè kwikala ne bakàji bàbidi. Ndi muswè kwikala ngendakana ne ewu nùнку, kwenza cikampànda ne wàwa nàka. Kàdi, mèmè mwenzè nàнку, mukàjàanyi's neàmbèngè mu dibàkà, ne bàna bàanyi nebiikalè mu . . .Mudimu wànyi wà bwambi's newùye.'" Cyena lubombo cyà bukooyà, cibolè naanyi we. Ncyà bushùwà's. Kwéna mumunangè mùdìbì bikèngediibwa to, twamb'eku twamb'eku. Aci ncyà bushùwà menemene.

353 Bu wèwè mumunangè, kakùvwakù mwà kwikala byà mikenji abi pa bwalu abu to. Udi mufwànyine kumunanga, nànsha bishi, ne kumulamata. Ncyà bushùwà menemene. Ne nwènu bakàji nenwènzè byà mwomùmwè bwà baabàyeenu. Ncyà bushùwà.

354 Míngà misangu bakàji bàtu bàlwa mu mùshindù, anyì . . .

355 Balùme bàdi bà mòna ka—Izàbèlè kakesè kadilaabè bilaabu ne penyì, nudi bamanyè's, ne—ne udi useemena kùdìye, ukwàcika dinanga bwà bwalu bwèndè, pàmwàpa pèèbe ne mukàji mwìmpè. Ne pashìishe udìbìikila mùdi mwena Kilistò. Bundù bwèbè. Bidi bikukèngela ndambù mukwàbò wa diya dyà ku cyoshelu. Ncyà bushùwà.

356 Ne bàmwè bàà kunùdì—ne bàmwè bàà kunùdì nwènu bakàji nudi nukènzakana numòna kalùmyànà kàà kale ne nsukì mifinunuja mipwekèlèlè, milaaba Vaseline wabùngì bwà . . . kàbuulula mukana. Ne dìbà adi ki wèwè . . .

357 Kansòngààkàji kakwàbò kàà kale kaaba aka, ànu àbìdì àdì panshì aa . . .Eci kí mbilèlè ngeela to, bwalu ncyèna ne meeji a kucilonda cyenzè bu bilèlè ngeela to. Kàdi bantu mbamanyè ne ewu kí mmwaba wà kwelela bilèlè to. Kàdi kansongààkàji kàà kale kaaba aka, kàvwa . . .Kùvwa nsongààlùmè milenga kaaba aka, nsongààlùmè myena Kilistò. Kùkaadi ntàntà mule, pàmvwà ngenza bumpaasàtà kaaba aka, tuvwa ànu ne tùlaasà twà nsongààlùmè ya bitende. Nèнку mvwa ngaakula ne nsongààkàji mu dyàlumingu mu mappingaja, pa bìdì bitàngilà bulume ne bukàji ne bikwàbò. Pashìishe mu mappingaja a dyàlumingu dìvwà dìlondà, ngaakula ne nsongààlùmè, ne nteeta bwà kwimanyika bintu abi.

358 Nsongààkàji kampànda wa citende kubangayè kupàtuka ne kàmpimpinyàmà kakwàbò, mu ville emu, kànwà mfwankà ne kiikàle ne mùlàngì wà mànànanshì mu mpaayà. Ne kiikàle kèndesha kàshinyì kàà kaabutakà lwà mu ville emu. Ncìvwakù mwà kumòna ne ncyìnyì cìvwàye mumòne mu nsongààlùmè awu to. Kàvwa muswè kulwa mu èkèleeziyà to. Úvwà usòmbela

lwà pambèlù pààpa. Ûlwa ùmushiya mu èkèleeziyà emu, ne pashiishe yéyè úshààla musòmbè pambèlù pààpa, mu kàshinyi kèndè aku amu, mwindile, kàyikù muswè kubwela mu èkèleeziyà to. Mémè kwambila nsongààkàjì awu dîngà ditùkù. Ûvwa musòmbèle mu New Albany. Mémè ne: “Ndi muswè nkukonkèku bwalu kampànda, mwàbànà. Nànsha twamba mwinè cyùdi mumòne mu mwinè nsongààlùmè wàwa ncinyi?” Mémè ne: “Cyà kumpàla, mmukìne ntèndeleele mwinè ùdi—ùdi nendè awu. Ùdi ùdyombola Kilistò webè. Kì mmufwànyinekù kwikala bàyeebè to. Mmufwànyine kukukèngeshesha, matùkù èb ònsò a mwoyi.” Kì mémè ne: “Èè, s’kùdi nsongààlùmè yà bitende milenga myena Kilistò kaaba aka yùdiku mufwànyine kuseeselangana naayi. Ne tatwèbè ne mamwèbè biinè’s mbakine meeji mene a dipàtuka dyèbè adi, kàdi nànsha nànkù wèwè udi ànu uya, udyàmbidila ne: ‘Nkàadi pàànyì mukolè ne bidimu byànyì dikùmi ne bisambòmbò.’”

³⁵⁹ Kubangayè ùkaadi ùdilaaba ne bilaabu ne ùpàtuka, dyà kààleelù edì, ùkaavwa mu binwìnù byà maalà. Ùkaadi muyè mu Cyendèleèlè patùdi twakulangana apa. Kàdi, musangu awu, ùvwa wìmana kaaba aka. Kàdi nudì bamanyè kabingilà kàakampèèshà nsongààkàjì awu kaaba aku, cìvwaye munangile mwinè nsongààlùmè awu? Wàkamba ne: “Ùdi ne tukàsà tulenga kumòna, ne ùdi ùtùma mupùyà mulenga wà dikèma.” Nudikù pèènù bafwànyine kudifwànyikijila ciinè aci anyi? Ùtu ùdyèla mánànanshì, awu’s ncilùmaacikàjì’s, kì mmulùmè to.

³⁶⁰ “Tàngilà,” mûngààkambà, “mwanèètù wa bakàjì, s’mbipicìibwekù ne useeselangana ne nsongààlùmè mwena Kilistò udi ne makàsà bu nkàtá yà màshinyi ne ùnunka lukishikishi, cibì kakùyi mpatà to mwikàle mwena Kilistò.” Ncyà bushùwà. Mbulelèlè. Èyowà.

³⁶¹ Kabingilà nkaakù ne: “Tukàsà tulenga kumòna, ne ùtùma mupùyà mulenga be.” Mwànà muyi wa mu binwìnù byà maalà awu, ndekeelu wa byònsò kunyangayè nsòmbèlu wa nsongààkàjì awu. S’mbundù, dibulà dyà ngàsà.

³⁶² Dibàkà ndyà bàtwa mushinga, kàdi bìvwa bìkèngela kubwèlamù ne disambila ne kaneemu kònsò. Ne dinanga dishùwashùwàlè bwà mukàjì awu nedinùswikàkàjè pàmwè bwà kashidi. “Cinùdi nuswika pa buloba, Mémè nènciswikè muDyulu.” Pawikalà ukaadi wenda upweka ne njila kuntu kwàka, mukàjì awu ùdi mwà kwikala ùkaadi mukùlùkàjì ne mvya ne minyèngù, kàdi dinanga dimwèdimwè dyùvwà naadi bwèndè yéyè pàcìvwaye mukàjì mutekète, mulenga adi, newikalè ànu naadi.

³⁶³ Wèwè udi mufwànyine kwikala ukàadi ne makaaya makòbàme, ne mutù-dibàla, ne kwìsù kwelè miknyèngù ne bikwàbò byònsò, kàdi yéyè neikalè ànu mukunangè bu paùcìvwà mwimùne ne makaaya maalàbàle ne nsukì mvwàngalà apu, piikalàci Nzambi cyà bushùwà. Bwalu kunùkaadi batàngile nku

cikondo cinwikalà mwà kusabuka musùlù wàwa, cinwèlà cidya kwalukila cyàkàbidi ku bunsongààlùmè ne bunsongààkàjì, bwà kwikala ne mwoyi kashidi pàmwè. Ki mulayi wà Cyendèlèèlè wà Nzambi ngwôwò awu. Yèyè ngudi mwambè ne neÀcyènzè. Yèyè, kí ng'ànu aci to, netùkùfikè mu katanci kakesè, Yèyè wàkadicipa ne neÀcyènzè.

364 Tèèlejàayi eci, patùdì tutùngunuka apa.

Udi muvwijìibwe, . . . bilondèshile mikenji yà . . . méyi matùma a musunya to, kàdi bilondèshile bukolè bwà . . . mwoyi wùdì kawùyi ne ndekeelu.

365 Mpindyewu netwikalèku mwà kubala lùkàsàlùkàsà, bwà twamònakù mwà kujikija.

Bwalu yèyè wàkafila bujaadiki ne: Wèwè udi mwakwidi bwà kashidi wa mu mulongo wà Melekisedekè.

Pìikalàku ànu dijinga dyà mwakwidi, Yèyè ngwìkala Mwakwidi.

Bwalu kùdì kùmwènèka dyumushìibwa dyà méyi matùma àvwà madyànjlè . . . butekètè bwà dibèngà dyàwù kutùkwàcisha.

Bwalu mikenji kayààkavwijakù cintu nànsha cìmwè cipwàngàne nànsha, . . .

366 Kwèna mwà kucyènzakù to, cyùdì wèwè wenza nànsha ciikàle cinyi. Udi ulekela kunwà kwà maalà, ulekela kunwà kwà mfwankà, ulekela kwamba kwà mashimi, uya mu èkèleeziyà ne uteeta bwà kwenza cikampànda ne uteeta bwà kwenza cikansanga, wèwè's ucidi ànu wa musunya. Aci cidi ànu mmikenji. Mikènji kayèèna yìvwijakù cintu nànsha cìmwè cipwàngàne to. Kàdi cidi civwijanganà mupwàngàne ncinyi? Kìlistò. Butùmbi's wè! Ndi mufwànyine kulekela kushima, kulekela kwiba, kulekela kwenda kwà masandi, kulekela kucyànkunya mfwankà, kulekela bintu byònsò, kàdi's ncicidi ànu wa musunya. Nzambi kèna ùcitaba nànsha, bwalu ncyèna ne cyà kuMulàmbula nànsha cìmwè to bu mulàmbù wà dijimija naawù mpèkaatù.

367 Kàdi mu kasunsa kàndì ànu ntèèka byanza byànyì pa mutù mubènèshìibwe wà Mukalenge Yesù, ngamba ne: "Mukalenge, ncyènakù mwìmpè to. Udikù mwà kungangata bu musadidi Webè anyi?" ne Nzambi ùtwa mpèkaatù wanyì awu mishikù yà dilayangana nendè adi, ndìndì ngiimana mupwàngàne ku mèsù kwà Nzambi. Ncyà bushùwà. Bwà cinyi? Ncyèna mwimànyine pa didikùmbanyina dyànyì mèmè mwinè to. Ndi mwimànyine pa Dyèndè Yèyè. Ne Yèyè ngudi mutùpwàngàje, ku dikèngeshìibwa Dyèndè ne Mashi Èndè.

368 Ndi mmòna ne dîbà dyà kwimanyika dyákànyì. Kàdi ndi muswè njikijèku kubala eci bu byòbì mwà kwenzeka, lùkàsàlùkàsà.

...madyànjile bwà butekètè dibèngà dyàwù dyà kutùkwàcisha.

Bwalu mikenji kayààkavwijakù cintu nansha cìmwè cipwàngàne nànsha, kàdi ditwàlà dyà ditèkemena ditàmbe bwìmpè ndyàkacyènza; (Ditèkemena ditàmbe bwìmpè ncinyi? Kilistò.) kutùdi tuseemenena pabwìpi ne Nzambi.

369 Bwà cinyi? Ku bwakànè bwètù bwònsò, ne bwakànè bwètù bwònsò, ne bwakànè bwètù bwònsò abu, tucidi ànu bàà musunya. Kàdi pàdibi ànu ne twáfiki mu Bwikadi bwà Nzambi, tujingulula ne katùvwakù bafwànyine kumwimana to, bu kakùyi ku dikùmbanyina dyà Yesù Kilistò, dîbà adi tudi tuseemena pabwìpi ne Nzambi, ku dikùmbanyina dyà Mwan'Èndè. “Mukalenge, nyewù ndwa Kùdi, ne mwoyi wùdi kawùyi ne dipiila. Mu Dîna dyà Mwan'Èbè Yesù, swàku ùngaakidilè.” Kaa, mwanètù, s'ukàadi wenda ulwila mu njila udi ne mwoyi dîbà adi.

370 Kî nnè: “Mukalenge, s'Udi mumanyè ne nkàadi mulekèle kunwà kwà maalà. S'Udi mumanyè ne ndi musòmbèshe mukàjàànyì bilenga. S'Udi mumanyè ne ntu ngenza *cikampànda*. Ntu ngenza *cikansanga*” to. Wèwè kwèna ne cyà kulàmbula nànsha cìmwè to.

371 “Bwalu mikenji yà mèyi matùma a musunya ayi kayìvwa mwà kwenza cintu nànsha cìmwè to, kàdi ditwàlà dyà ditèkemena dikwàbò ndidì dicyènzè. Ditèkemena didì Kilistò adi, tudi naadi bu lwongò lwà musùukà, dishindàme ne ditwìshìibwe.” Tàngilàayi.

Ne mu mùshindù wà ne kakùyi mucipù yèyè. . .

Mupinganyi, bu nwènù mwà kumòna mwómò emu, mmufùnda mu màleetà masendamija.

. . . yèyè wàkavwijìibwa mwakwidi:

Kàyi ànu mwakwidi cyanààna to, kàdi Wàkavwijìibwa Mwakwidi ku mucipù. Kakùyi. . .

372 Mpindyewu tàngilàayi. Twǎnjàayi kwangata bukwàbo bwakwidi abu.

(Bwalu baakwidi abu, beena Lewi abu, bantu balulàme, baakàne, bàà meeji matòòke, baakwidi abu bààkavwijìibwa nànkù kakùyi mucipù to; . . .)

373 Nzambi mmwambè ànu cyanààna ne: “Mu mulongo wà—mu mulongo wà Aalònà ne, mmwàkavwijàYe baakwidi aba.” Bààkalondangana mu nkòngo yònsò ayi. Bàya mu kàlaasà ne bàyiila mwà kwikala bayiishi ne bikwàbò. Bàvwa bàlondangana. Nènku Nzambi ùvwa ùbàvwija baakwidi

mùshindù awu. Bàvwa bàdivwija bôbò biinè baakwidi, ku dilonga dyàbò dyà tùlaasà, ku bumpyànyì bwàbò, ne bikwàbò. “Kàdi ewu Muntu Yéyè wàkavwijiibwa Mwakwidi ku mucipù wùvwà Nzambì mwenzè.” Tèelejàayi ne ntèmà yònsò mpindyewu.

(. . .bààkavwijiibwa nàнку kakùyi mucipù to; kàdi ewu yéyè nnè mucipù kùdi yéyè wàkamwambila ne: Mukalenge mmudicipe ne kààkunyingalalakù to, amen, Wèwè udi mwakwidi bwà kashidi mu mulongo wà Melekisedekè:)

Mu mùshindù wà ne Yesù wàkavwijiibwa cishindiki cyà cipungidi citàmbe bwímpè.

Mpindyewu, lùkàsàlùkàsà.

Ne ncyà bushùwà ne bôbò bàvwa baakwidi bàabùngì, bwalu kabàvwa bàtwàla mwà kutùngunuka to bwà bwalu bwà lufù:

Binunu misangu binunu misangu binunu, byà baakwidi, bwalu kabàvwa ne cintu nànsha cìmwè to ànu lufù ne lufù ne lufù ne matekète, ne lufù ne lufù ne lufù.

³⁷⁴ Kàdi Mutàngilaayaaku Yéyè.

Kàdi ewu muntu yéyè, (Muntu kaayi awu?) Yesù, bwalu yéyè ùdi ùtùngunuka díbà dyònsò kashidi, ùdi ne bwakwidi bwà kabùyi bùshintuluka. Mùdi . . .

Ki bwà cinyì ùdi kàbìdi mukùmbàne mwà kubàsùngila too ne ku ndekeelu; nànsha kule kwà bishi, nànsha bàà ciipanshi, nànsha kule menemene kwà bishi, Yéyè mmukùmbàne mwà kusùngila too ne ku ndekeelu; aba bàdi bàlwa kùdi Nzambì kupìcila kùdiye, . . .

Kabiyi byà ne . . .pa bwakànè bwèbè wèwè to: kàdi pa ditonda dyèbè. Nwamònu anyi?

. . .bàdi bàlwa kùdi Nzambì kupìcila kùdiye, bu mùdìbi ne yéyè ùdi ne mwoyi kashidi bwà kubàakwila bôbò abu.

Yéyè ùdi mwab’awu mene, díbà dyònsò, wàkwilangana.

Kùdi mwakwidi munène wa nàнку awu nguwwa utùkùmbanyina, udi wa cijila, kàyi mwà kwenzelangana bibi to, kàyi mukooyike, mutàpùlùke ne bangènzàmpèkààtù, ne muvwijiibwe Mwakwidi Munène mu Dyulu;

³⁷⁵ Ki cyôci aci. Mpindyewu, mèmè muteetè bwà kudilumbulwila mèmè mwìnè cilumbù cyànyì, s’nèmpiilè. Mèmè muteetè bwà kudilumbulwila, ngamba ne: “Èè, papa wanyì ùvwa muntu mwímpè. Papa wanyì ùvwa muyiishi. Èè, ntu mukolèle mu èkèlezayà.” S’ncicidi ànu mupiiilè. Kàdi ewu Muntu Yéyè mmupwàngàne, Kilistò. Yéyè mmusòmbe mwaba awu

ùfila Mashì Èndè dībà dyònsò bwà mpèkaatù yànyì. Ki bwalu mbwòbù abu's.

Udi kàyi dijinga ku ditùkù ne ku ditùkù, mùvwà bóbò abu... bakwidi, bwà kufila milàmbù, dyàmbedi bwà yèndè mpèkaatù sungasunga, ne pashùshe bwà yà cisàmbà: bwalu cyôci eci yéyè wàkacyènza musangu wùmwe, pààkadilàmbulàye yéyè mwinè.

376 Mpindyewu tàngilàayi mvensà wa ndekeelu.

Bwalu mikenji yìdi yìvwija baakwidi banène bantu bàdi ne matekète; . . .

377 Ki cìdi mikenji, mikenji yà musunya yènza, ncyôci aci. Mpindyewu, mvw'a kujinga bwà ng'ikalakù ne mèbà àbìdì majimà kaaba aka mene. Ki mùcìdì mikenji yìvwija bantu bayiishi. Ncyà bushùwà.

378 Mòna's, bàdi bàmba ne: "Èè, muntu ewu ùdi ne dilabula dyà ku sèminèrè." Mémè ncyènàku mufwànyine kushintakaja dilabula dyànyì dikesè dyà kale dyà ku Dyulu ne maasèminèrè ònsò a pa buloba nànsha.

379 "Mòna's, tudi balongèshe muntu ewu tùlaasà. Yéyè—yéyè mmusòbola ku byanza. Mmuntu udi mudikolèle." Mémè nci tu munangè bàà mùshindù awu to. Mémè ntu munangè muntu mufwimba kùdì Nzambì. Nwamònu anyi? Nwamònu anyi?

380 Kàdi mikenji yìcìdì ànu yènza baakwidi. Mikenji yìcìdì ànu yènza bayiishi. Èkèleeziyà wa—wa ba-Baptistes, bàdi bàpèeshangana bayiishi; manza mùle tèntè naabò, biikàle ne màshinyì àdi àbàpàtula bu ku mukàbà. Ba-Méthodistes bàdi naabò. Ba-Baptistes bàdi naabò. Ba-Presbytériens, ba-Nazaréens, ba-Pèlèrins de la Sainteté, beena Mpenta, bàdi bàbàpàtula bu ku mukàbà lubilu ne mwàbò mwònsò, cyènzè mùdì ndongolwelu munène, màshinyì manène. Biimàne mwaba awu bu . . .

381 Nkàadi misangu yònsò mwambàmbe ne: "Mvwa—mvwa cyà bushùwà ngumvwa luse bwà nzòòlò mutooyishila mu cyamù." Nudi bamanyè's, kazòòlo katooyishila mu cyamù, kí nkatooyisha mu mùshindù wùdì wùkèngediibwà to. To. Cíkuka ncidi ne cyà kutooyisha kazòòlo. Kàdi kazòòlo katooyishila mu cyamù, pàdìku kàpàtuka, kàdi kènza "cyokò, cyokò, cyokò," kàdi kakàyi ne mamwàkù wà kuyakù kùdiye to. Nwamònu anyi? Kí nkamanyè ne maamù mwinè nganyì to. Ncyà bushùwà's. Kàdi kàdila kàbìikila mamwàkù, kàdi kakàyi nendè to.

382 Kàdi kazòòlò kàdi katooyishila mwinshì mwà cikuka, mùshindù wà mu bufùki, kàdi kàbìikila ne mamwàkù wàndamuna. Ncyà bushùwà's.

383 Nènku mîngà misangu ntu ndyàmbedila cyôci eci bwà dilabula dyà ku sèminèrè edi didì dipàtùkilà mu byamù binènè bitooyishi byà mu Louiseville ne pa buloba bujimà

ebi, bitooyishangana ne bayiishi binunu ne binunu. Byamù bitooyishi byà beena Mpenta, ne byamù bitooyishi byà ba-Presbytériens, ne—ne byamù bitooyishi byà ba-Baptistes, byônsò abi bìdi bitooyisha twàbò—twàbò—twàbò twànà twà nzòòlo. Tùdi twènza ànu, “cyokò, cyokò, cyokò,” kàdi tulongelangana ànu bwà byamù bitooyishi mùvwàtu tutooyishila amu.

³⁸⁴ Kàdi mèmè ndi munangè kwikala ne Taatù, ne Maamù. Dîna dyà Mukalenge dîbeneshiibwè! Kakùvwa bààbùngì menemene balediibwe naanyi to, kàdi mbànà bèètù. Amen. Tudi ne Maamù udi wandamuna paùdi. . . Maamù Udi mu Dyulu, Udi utùbèèja twètù bônsò. “Ànu mùdi cikuka cikungwija twànà twàcì, ne ùtùbùikila, ne—ne wàmbishila kumutù kwèndè. . . ùbwikidija twànà twèndè mapwâpwà, ki mùNgàakubwikidijà mapwâpwà. Èyì Yelusàlèrà, Yelusàlèrà, mùshindù mwinè wùNkaadiku misangu yàbùngì muswè kukwangata mùdi cikuka cyàngata twànà twàcì! Mùshindù mwinè wùNkaadiku misangu yàbùngì muswè kukuvwija Wanyì Mèmè, kàdi kwàkaswà to. Udi mudipetèle sèminèrè yèbè wèwè mwinè, mutooyishe bansaserdose bèèbè wèwè. Bàakulongèshì bibèngàngàne ne Mèmè. Mpindyewu wadishàadidi. Kabùtù kèèbè nkakutèkela kumpàlà.”

³⁸⁵ Mpindyewu mèmè ndi ngamba nènku ewu: Kaa, nwènù bantu, kaa, nwènù bantu, mùshindù mwinè wùkaadiku Nyumà Mwimpè muswàswàswè bwà kunùkùngwija, mùdi cikuka cikungwija twànà twàcì, kàdi nwènù nudi baswè wenù njila wa sungasunga, nenùpetè wenù njila wa sungasunga pa bìdi bitàngilà cyôci aci!

³⁸⁶ Dimwè dyà ku malòòlò aa ndi muswè kuyiisha pa ne: “Webè njila wa sungasunga.” Nudi bamanyè’s, Kaayinà wàkaswà wèndè njila wa sungasunga. Muntu muswè wèndè njila wa sungasunga, leelù ewu. “Kàdi kùdi njila udi umwèka bu ne mmwimpè, kàdi ndekeelu wèndè ndufù.”

³⁸⁷ Mpindyewu tàngilàayi. “Mu cyôci aci Yèyè ùdi wàmba ne: ‘Cipungidi cipyacìpyà—cipyacìpyà. . .’” Ngeela meeji ne, mpindyewu udi. . . To. Mvwa mu mwaba wà cyanàànà.

³⁸⁸ Mvensà wa 28.

Bwalu mikenji yìdi yìvwija baakwidi banènè bantu bàdi ne matekète; kàdi dîyi dyà mucipù, dikaarwàku kacya ku mikenji adi, ndidi divwija Mwànà, yèyè udi mutungùnùke bwà kashidi awu.

³⁸⁹ Nzambi àbeneshiibwè kashidi, bwà Mwànà udi mutungùnùke bwà kashidi wa mu mulongo wà Melekisedekè. Ne kacya Yèyè kàvwakù ne ntwàdijilu to. Kacya Yèyè kàvwakù ne ndekeelu to. Kàdi mikenji kayìvwakù mwà kupàtula cyà nàнку nànsha cìmwè to, bwalu yìvwa yà musunya. Èkèleeziyà kèna mwà kupàtulakù cyà nàнку nànsha cìmwè to, màngumba awu, bwalu òwò ngàà musunya. Maa—maasèminèrè kaèna mwà

kupàtulakù cyà nànkù nànsha cimwè to. Mbateetètèete bwà kuKùfikisha bantu ku dibàlongesha tùlaasà. Mbateetètèete bwà kuKùfikisha bantu ku dibàvwija malongolodi. Mbateetètèete mùshindù wònsò pa buloba, bwà kwenza cintu cyònsò cìvwàbo mwà kwenza aci, kàdi biikàle bàshiya ku luseke cintu cìdi ne mushinga cyà ne: “Udi ne cyà kulediibwaMù.” Nzambì ngudi ukuvwija cyùdi aci, cyà bushùwà, kabiyi ne mbwalu udi ulekelà kwenza *bikampànda* to.

³⁹⁰ Mpindyewu, ba-Nazaréens, kanwèna ne cyà kwela mpètà ku munu to, kanwèna mwà kuvwàla dībà dyà ku dibòkò to, kàdi bikèngela nwènzè bintu *kampànda ne kansanga*, bikèngela bwà mabòkò ènù ikalè bule *ebu*, mabòkò ènù a mitèèlu, bikèngela bwà jipè yènù yikalè bule *ebu*, ne—ne bantu balùme kabèèna mwà kushààla beena diswa *kampànda* to. Ne kabàakunùbàtiiza panùdi kanùyì babineemèkèle to. Èyo. Ki beena Kàtòlikè bàdi bàbwelà aba, biikàle ne byàbò pààbò. Kàdi ki ba-Méthodistes bàdi bàbwelà aba, biikàle ne byàbò pààbò. Yònsò wa kùdìbo ùdi ne cipiminu cyà kupimangana naaci. Wèwè kùyì mukùmbànàngàne naaci to, èyo, kwàjiki. Nwamònu anyi?

³⁹¹ Nènku dībà adi, kàdi cintu cilelèlè cìdi, cìdi ne: “Ncyèna ne cintu nànsha cimwè cìndi ntwàla mu mabòkò àànyì to! Ànu ku nkùrusè Webè nkùndi ndamata. Èyì Nzambì, butakà, mutàpa mpùtà, ndi ne dijinga ne dikwàcishiibwa. Kaa, ndwàlwa ne kudìpwekesha kwònsò, Kilistò, mwikàle ntonda ne ncyèna ne cìndi ciinè to ne kakwèna cintu nànsha cimwè mu mèmè to. Ngaakidilèku, Èyì Nzambì.” Dībà adi Nzambì ùdi ùkwakidila.

³⁹² Mpindyewu, udi mufwànyine kwikala kùyì mumanyè nànsha ABC to. Udi mufwànyine kwikala kùyì mumanyè mwà kusunguluja kàfè ne nkùnde misunga to. Udi mufwànyine kumanya, kùyì mwà kumanya kusunguluja kyà ne hò, dyàbalùmè ne dyàbakàjì to. Cyùdi *kùyì* mumanyè kacyèna ne cidici cishintulula to. Kùdi cintu cimwèpelè cyùdi *ne cyà* kumanya, ncyà ne, Yesù Kilistò wàkangata kaaba kèèbè bu ngènzàmpèkàatù. Nènku wèwè angàtà kaaba kèèbè, bwà kwimana mu bwakanè Bwendè, utonda ditùkù dyònsò mùdi mupùile, ne muMunangè ne mwoyi wèbè wònsò, ne tubingilà twèbè twònsò twikalè tutàngija kùdiYe, neùfikè mu Dyulu. Ki cyònsò cidiku ncyòci aci, bwalu bidi bikèngela bwà Mwoyi wùvwà munda mwà Kilistò wikalè munda mwèbè, bwà cyanààna udi mujimìne.

³⁹³ Kumpalà menemene kwà kujikija, nudikù bavùlùke cipungidi cyà kacyi mushingà mwenza cyàkenzà Nzambì ne Abraham aci anyi? CyàkenzàYe ncinyi dilòlò adi pàakambà Nzambì ne: “Enzàku mmonè...” Pàakambà Abraham ne: “Enzàku mmonè muWikalà mwà kucyèenza.” Nshapità wa 16, ngeela meeji ne nyèyè, wa Genèsè. “Enzàku mmonè muWikalà mwà kucyèenza.”

³⁹⁴ KwambaYè ne: “Vwilà kùneeku, Abraham.” KuyaYè ne Abraham, kwamba ne: “Ndà ùkaNkèbèlè cì—cimpàngà cyà mùkòòkò, ne ndà ùkaNkèbèlè mbù—mbù—mbùji, ne ndà ùkaNkèbèlè ngombe wa lukùngùlù. Nènku Ndi muswè ùlwe naabi kaaba aka wènzè mulàmbù.”

³⁹⁵ Ki Abraham kuyayè kangata mùkòòkò awu, ne—ne mbùji, ne—ne—ne kànà kàà mùkòòkò, anyi, ngombe wa lukùngùlù awu. Ki kubìshebeyayè. Byònsò bìvwa milàmbù mikezùke. Ne kubìpandululayè munkaci mu bipese bìbìdì bìbìdì, ne kubitèekayè mwaba awu. Pashiishe kuyayè kangata tuumàndànkùcì túbìdì, ne kutùsàkìdilayè muntwamu. Pashiishe Abraham kutàngilayè bwa nyuunyi kwikalayi kule naabi, mwindile bwà Nzambì àlwe. “Mpindyewu, Mukalenge, ki mulàmbù ngwówù awu, neWikalè mwà kucyènza munyi? Mèmè ncyèna mumanyè muWikalà mwà kusungila muntu bibèngàngàne ne diswa dyèndè sungasunga to. Ncyèna mumanyè muWikalà mwà kwenza cyòcì eci to. Mmunyi mÙdiku mwà kucyènza, Mukalenge?”

³⁹⁶ Mukalenge kwambaYè ne: “Mpindyewu tàngilàaku, Abraham. Wèwè udi mupròfetà. Udi wa nyumà, nènku neúmvwè cìNdì ngamba aci.”

³⁹⁷ “Èyo, Mukalenge, ndi muswè mmonè.” Mpindyewu ndi ànu ndeeja bu dinàya cyanàànà.

³⁹⁸ “Pa nànkù, Abraham, vwilàaku kùneeku mpindyewu, ne sòmbelàku apa ne tàngilàku bwà nyuunyi yàya yikalè kule.” Ki kwipatayè nyuunyi yònsò ayi ksh ksh, too ne pààkabangà dîbà kubwela.

³⁹⁹ Ki katancì aka, Nzambì kupwekaYè. PààkapwekàYè, Abraham kubangayè kubùngila ne tulù. Nzambì kwambaYè ne: “Abraham, Nènkulààdikè tulù.”

⁴⁰⁰ Mpindyewu tèelejàaku, wèwè mulundà wanyì mwena ne ànu mikenji. Nwamònu’s, Nzambì wàkuumusha ànu menemene Abraham mu cyalu amu, kakùyikù cyà dycenzayèmu nànsha cìmwè to. Nènku mùshindù awu ngùdìYe mukupetè wèwè. Wèwè wambì ne: “Kaa, ndi mukèbe Nzambì.” Bwàlà.

⁴⁰¹ Nzambì ngudi mukukèbè wèwè. “Muntu nànsha umwe kèna mwà kulwa kùNdì pàdì Taatù Wanyì kàyi mumukòke dyambedi nànsha.” Nwamònu anyi?

⁴⁰² Nzambì ngudi wenda ukukèba wèwè, kì ngwèwè udi wenda ukèba Nzambì to. Kacya kùtukù mucyènzè to. Ngiikàdilù webè wèwè kì mmukumbàne to. Wèwè udi ngulube. Kwèna mumanyè dishiilangana to. Udi wèwè musòmbèle ànu mu cikumbì cyà ngulube cyanàànà. Ki cyònsò cyùdì mumanyè. Ki cyùdì munangè. Kunwà maalà a byèrè, kudìvwànda mu bitocì, kwenda masandi ne mukàji wa mwena mutumba, ne kwenza byònsò byùdì mwà kwenza bìdì bibi abi, bìdì bimwèka

ànu bîmpè. “Kaa, mwanèètù, tudi tupìcila mu cikondo cyà dicyònkomoka’s!” Wèwè ngudi udyàm̀bidila ne ncîmpè awu.

403 Kàdi Nzambi ùdi ùkookola ku mwoyi wèbè. [Mwanèètù Branham ùdi ùkookola pa cyambilu—Muf.] Kì cidì cishintululungana ncyòci aci. Kì ngwèwè udi ukookola kùdi Nzambi to; Nzambi ngudi ukookola kùdi wèwè. Adàmà kàakakookolakù ku mwoyi wà Nzambi to; Nzambi ngwàkookola ku mwoyi wà Adàmà. Ne wèwè udi mwànà wa Adàmà. Ncyà bushùwà. Kumpàlà kwà Adàmà kwikalayè mwànà wa Nzambi, cyàkàbidì, byàkakèngela bwà Nzambi kukookolaYè ku mwoyi wèndè. Kumpàlà kwà wèwè kulwa mwànà wa Nzambi, bikèngela Nzambi àkookolè ku mwoyi wèbè aku.

404 Dìbà adi, Abraham kuyayè mu tulù. Ne pàakayàye mu tulù, cintu cyà kumpàlà cyàkamònàye ncinyi? Mídimà mibi be, yà yìkwàcisha bwòwà be, yà yìcìinyishangana. Kì lufù ndwólù alu, lùdi lùlwa pa bukwàbantu bujimà. Pashiishe kutàngilayè kule ndambù kutàmbe aci, ne kumònayè cikùtù cyà mwishì. Kumpàlà kwà wèwè kupeta mwishì, bikèngela wànji kwikala ne mudilu. Kì bwà cinyi ntu ngiitabuuya ne ifernò mmwaba wà wòsha. Èyo.

405 Mmuleejè ne, yònsò wa kutùdi ùdi ku bukòokeshi bwà lufù, ne bìvwa bikèngela bwà yònsò wa kutùdi kuyayè mu ifernò, bwalu tudi bangèzàmpèkààtù.

406 Mpindyewu, kàdi, dyàm̀wàm̀wà dyà cyòci aci, kumònayè kaaBukènkè kakesè, katòòke.

407 Nènku kaaBukènkè kakesè, katòòke aka, Bukènkè ncinyi? Bukènkè butòòke abu bìvwa ncinyi? Dikunji dyà Kapyà dyàkendà kumpàlà kwà bàna bàà Izàlèlèlè adi. Dikunji dyà Kapyà dyàkatwìlanganà ne Pólò mu njila wa ku Damàsèkè adi. Dikunji dyà Kapyà dyàkapàtulà Peetèlò mu bùlokò adi. Dikunji dyà Kapyà didì kaaba aka dilòòlò edi adi.

408 Nzambi wa Cyendèlèlèlè, wa kashidi awu, Wàkendela Yèyè mwinè munkaci mwà milàmbù mipanda eyi, (kaa, ekelekèle), ùtwa kumpàlà ùtwa paanyimà pa wònsò wà ku yòyi. “Mùshindù ewu ki wùngiikalà mwà kucyènza, Abraham. Ntàngilè, cìNgiikalà mwà kwenza. Ndi munkaci mwà kwenza cipungidi kaaba aka. Ne Nèngènzè mucipù, ne, bilondèshile Dimiinu, Nénjuulè Mwakwidyanganyi. Nèngènzè cipungidi ne lufù. Ne Nèmpiishè lufù, mu mubidi, bwalu Mèmè mwinè Nèndwe kulwàngata. Abraham,” mwàkambàYe, “kupicila ku Dimiinu dyèbè, Abraham, nekùlwe, wèwè newikalè taatù wa buloba bujimà, kupicila ku Dimiinu dyèbè wèwè adi. Ne kí ng’ànù wèwè nkààyeebè, ùNdi ngenza nendè mulayi ewu to, kàdi ne Dimiinu dyèbè paanyimà pèèbè.” Yèyè ùvwa mumanyè muntu ne muntu ùvwa mwà kwikalakù. “Kì mbòbò to; kàdi cìndi Mèmè ngenza aci. Mèmè ngwìkala mwà kucyènza, Abraham. Mwva mweyemène Adàmà, kàdi kushipayè cyèndè. Ne muntu yònsò ùdi

ùshipa cyèndè. Kàdi Nèngéznè eci ne Mémè mwinè, ne ndicipila ku Mémè mwinè ne: “NènCilamè.” Amen. Amen. Amen.

409 Tudi twenza cinyi, patùdi twenza cipungidi? Ndi ngamba ne: “Mwanèètù Neville. . .” Mpindyewu tàngilàayi eci, katanci kakesè cyanààna. Ngamba ne: “Mwanèètù Neville, ndi nkwambila cingènzà. Wèwè muyiishè too ne. . . mààlabà dilòòlò, ne dilòòlò didi dilondà, too ne mu diisàtù, mémè nényiishè, kuumukila mu diisàtù amu, too ne mu dyàlumingu.” [Kàtùpà kàà mukàbà wà mèyi munda mutupù—Muf.] “Udi witaba nàнку anyi?”

410 “Èyowà’s, mukalenge.”

411 Mùshindù wutùdi tucyènza ngwòwù ewu. “Ndabùlèbi ku cyanza tǔng, mulùmyàna.” Ki cyòci aci. Ki cipungidi ncyòci aci mu Àmèrikè. Ki mùshindù wutùtù twenza cipungidi ngwòwò awu.

412 Mpindyewu, bàtu bènzà cipungidi bìshi mu Japon? Tudi twenza, twamba ne: “Wèwè udi wenza *cikampànda*, ne mémè ndi ngenza *cikansanga*.” Twangata tuumukèlè tukesè ku nsongo yà minu, bwalu mukèlè wùdi ne ditwà. Nènku tudi twangata mukèlè, ne mémè ngwèla Mwanèètù Neville pambidi, ne Mwanèètù Neville ùdi wàngata mukèlè—mukèlè ne uwungeela pambidi. Ki cipungidi cyà diswikangana ncyòci aci.

413 David Livingstone wàkenza cipungidi ne mufiike wa mu Àfrikè bìshi, bwà kubwelayè mu buloba bwèndè? Wàkaya kangata mfùmù, bwà wàmòna mwà kupìcilamù, bwà kuyiisha Èvànjeeliyò ne kukwàtamù mudimu. Ki kwangatabò cilàwudi cyà maalà. Eci nciipungidi ne mufiikè wa mu Àfrikè. Kwangatabò cilàwudi cyà maalà. Ki mfùmù wa bafiike awu kutùbulayè mijilu yèndè sungasunga, kuzòlolojayè mashi mu cilàwudi cyà maalà amu. Ne David Livingstone kutùbulayè mijilu yèndè sungasunga, kuzòlolojayè mashi mu cilàwudi cyà maalà amu. Bòbò kuàvundulula. Livingstone kunwàye cyàbìbìdi cyàwù, ne mfùmù wa bafiike awu kunwàye cyàbìbìdi cyàwù. Pashiishe kupèeshanganabò màtàpishì, muntu ne mukwèndè. Mfùmù wa bafiike awu, David Livingstone kwambayè ne: “Cyùdi wèwè undòmba ncinyi?”

414 Awu ne: “Nkooci mutòòke ùdi muvwàle awu.” Ki Livingstone kukòpolayè nkooci wèndè mutòòke awu e kumupèeshayè mfùmù wa bafiike awu. Awu kwambayè ne: “Cyùdi wèwè ulòmba ncinyi?”

415 Yèyè ne: “Difùmà dyà bumfùmù dyùdi naadi mu cyanza adi.” Bwalu, ùvwa mumanyè ne ùvwa mwà kubwela naadi, ki kwangatayè difùmà adi. Nènku bààkalwa bàna bàà muntu, bwalu bààkenza cipungidi.

416 Nènku pàvwàye wènda ùya apu, ne beena bisàmbà abi bàpàtuka lubilu bwà kumushebeya, ùvwa ùjuula difùmà dyà bumfùmù adi muulu. Nènku pàvwàye ùdijuula muulu, bàvwa

bàtàngila bàmba ne: “Akà, akà, katwèna mwà kulenga wàwa muntu nànsha.” Bwà cinyi? “Mmwanèètù ku cipungidi, nànsha mùdiye mutòòke, kacya katùyikù banji kumumòna kwonsò eku.” Kabàvwakù bamanyè nè mbafiike to ànu pààkamumònàbo yèyè. Kacya kabàvwakù banji kumòna aci kwònsò aku to. “Kàdi yèyè’s mmwanèètù ku cipungidi. S’nyèyè awu ne difùmà dyà mfùmù mu cianza cyèndè.”

417 Cimfwànyì bulenga kaayì, leelù ewu, cyà kunwà cipungidi cyà Mashi a Mukalenge Yesù, biikàle ne bukolè bwà Nyumà Mwìmpè pambidi pèètù! Tudi tuya kumpàla mu Dìna dyà Yesù, ne bimanyinu ebi nebilondè aba bàdi beenabì. N’Difùmà dyà bumfùmù dyà Sheefù awu. Nudi bamòne mùdici anyì, cipungidi aci?

418 Bàvwa bàcyènza bìshi mu cikondo cyà beena kùdì dîbà dipàtukila? Bàvwa bènza mucipù, muntu ne mukwèndè. Bàvwa bàshebeya nyama, bamupanda, ne bìimana munkaci menemene amu. Ba—bantu bàbìdì abu bàvwa bìimana munkaci mwèndè, mwà nyama mupanda amu. Nènku bàvwa bàzòla cipungidi. “Mèmè mupangè kulama cyòci *eci*, mèmè mupangè kwenza cyòci *eci*, mòna’s, cyòci *eci* ne *cikampànda*, mubidi wànyì wikalè ànu mùdì nyama mufwè ewu emu. Mubidi wànyì wikalè ànu mùdì nyama mufwè ewu.” Ne pàdìbo bènza nànkù apu, bàdi bàngata ciinè cipungidi eci bìimana munkaci mwà cyòci *eci*; bènza mucipù, bènza mucipù ne nebàcyènzè. Nènku bàdi bàpanda dibèji adi, pàmwè, bipese bìbìdì, ne bàpèèshangana eci kùdì muntu, cikwàbò kùdì mukwàbo awu. Pa dîbà kampànda nebàtwilanganè. Nènku bàngata kufwà anyì bàfwe, bóbò ànu badìdinge bàpangè kulama mucipù awu; ne bìikalè bu nyama mifwè ayi. Èyo.

419 Nudi numòna nyama yisàtù ayi anyi? Mipwàngàne ayi; mwànà wa mùkòòkò, mbùji, ne mulàmbù mupwàngàne wà nyama yisàtù awu. Mwànà wa mùkòòkò ùvwa cinyi... Kaamàndànkùci kàvwa ncinyi? Ne tuumàndànkùci tùbìdì atu tùvwa tuumvwija cinyi? Tuumàndànkùci tùbìdì atu tùvwa tulàmbùdìibwe bwà lupàndu ne dyondopa, mu—mu... bìvwà bìbwelàmu abi. Nwamònu anyi? Difuta dya bibawu òvwa dyènjiibwa bishiilàngàne, kàdi dyondopa òvwa ditungunuka mùshindù wùmfwèwùmfwè awu, ne lupàndù kàbìdì lùvwa lùtungunuka mùshindù wùmfwèwùmfwè awu. Tuumàndànkùci tùbìdì atu, katùyi twabulula to, tùvwa tuumvwija ne tùvwa tuleejìibwe, twònsò tùbìdì. Lupàndu... “Ku mibùndàbùndà Yèndè twàkondopiibwa. Wàkatàpiibwa mpùtà bwà kushipa kwètù kwà mikenji. Ku mibùndàbùndà Yèndè twàkondopiibwa.” Tùvwa tutèkiibwe ku luseke, katùyi twabulula to. Kàdi cipungidi aci, cipese cyà nyama cìvwa (yònsò yisàtù ayi) uvwa mupanda bipese bìbìdì awu. Nudi numòna anyi? Pashiishe pàvwàbo bènza nànkù, bàvwa bàpanda ne bènza cipungidi cyàbò aci.

420 Tàngilààyi nùmonè cìvwà Nzambì munkaci mwà kwambila Abraham aci ne: “Ku Kàlvariyo, ku Kàlvariyo, bilondèshile Dimiinu dyèbè. Munda mwèbè mmupàtùke Izàkà, munda mwà Izàkà mmupàtùke *Kampàndà*, Yakòbò, munda mwà Yakòbò mmupàtùke Yözefù, munda mwà Yözefù, ànu nàнку, ànu nàнку, ànu nàнку, bàlondyanganyi, too, ndekeelu wa byònsò, mu Dimiinu dyakàne adi!” Dyèndè . . .

421 Wafùmu ku dyamba, kaaba aka, ne Mukalenge wetù mmupàtùkile mu ditùngà òvwà kadiyi dimanyè to. Mòsà kàakambakù nànsa mene bwalu abu to, ne mmupàtùkile mu bwakwidi kampànda. “Mukalenge wetù mmupàtùkile mu cisàmbà cyà Yudà.” Kàyi mupàtùkile mu Lewi to, bwalu bàvwa beena ne ànu mikenji bàà musunya. Kàdi Mukalenge wetù mmupàtùkile mu Yudà. Butùmbi’s wè! Ki bwalu mbwòbù abu’s. Mùvwà mulayi mwenjìbwe amu!

422 Tèèlejààyi ne ntèmà yònsò mpindyewu, patùkaadi tujikija apa. Nènku ku Kàlvariyo, Nzambì wàkapweka e kwàngata mubidi wà Mwan’Èndè Sungasunga, mùvwàYe musòmbèle amu, ne Wàkawùpanda bipese bìbìdi ku Kàlvariyo. Wàkazànyika mashi, kutàpiibwa mpùtá, kukòshiiibwa, ne difùmá dyàkabwelamù ne kuMupandulula bipese bìbìdi, ne Mashi Èndè àkazòloloka. Ki kwambaYè ne: “Taatu, mu byanza Byèbè mmùNdi ndàmbula Nyumà Wanyi.” KwinyikaYè mutù. Ne buloba kuzakalabù, ne mikenyi kwelayi, ne mikungulu kukungulayi. Nzambì nguvwa munkaci mwà kufùnda cipungidi Cyèndè cyà kashidi awu.

423 Ki kuumushaYè mubidi Wèndè mufwè awu mu lukità, mu ditùkù dyà kumpàlà dyà lumingu, ne kuwàngata e kuwùbweja mu Dyulu, ne kuwùsòmbeshamù bu Mwakwidi Munè, bu civùlukilu; musòmbemù, mupwàngàne, bwà kashidi. Ki kwalujaYè Nyumà uvwaYè mupàtùle mu kupanda kwà wòwò mubidi awu awu, buludì panshì pa Èkèleeziyà. Nènku nebikèngelè bwà Èkèleeziyà ikalè ne Nyumà umwèumwè uvwa mu mubidi awu awu, bwà cyanàànà kawàkunwàngana Nèndè mu dibìikà dyà ku lufù to. Bipese bìbìdi abi bìdi ne cyà kutwàngana ànu menemene. Ne Èkèleeziyà ewu Yèyè kàyi mupwàngàne, ànu menemene Nyumà umwèumwè uvwa munda mwà Kilistò awu to, wèwè kwakùyakù mu Dyambwibwa nànsa.

424 S’ki cipungidi cyà kashidi aci, mwanèètù. Dikèbèleci, wèwè mwinè, cidi mu mwoyi wèbè sungasunga aci. Nangà Mukalenge. Ikàlà mutwishiiibwe bulelèlà ne udi musùngìdiibwe. Kwikadi unàya ne mudilu pa bwalu abu to. Udi udyà lupiku’s. Kaa, nwènù, twètù beena Àmèrikè, tutu banangè kudyà lupiku, kàdi kùdiidi lupiku pa Aci to. Ikàlà mutwishiiibwe udi mùdi ne cyà kwikala. Kàbiyi ne bwalu udi muyè kashàala wa ku èkèleeziyà kampànda to, kàdi bwalu udi bulelèlà mulediibwe cyàkàbìdi, Kilistò mmulwè kùdi, mu Mupersona wa Nyumà Mwimpè.

425 Mpindyewu, ànu bwà kààlumbandi kàbìdì, ànu pánkaadi njikija apa. Mùshindù mwinè wùvwàbì bikèngela bwà twètù kwikala ne disànka, pa kumòna mùdì Nyumà umwèumwè uvwa munda mwà Yesù Kilistò awu, munkaci mwètù mene, wènza bintu bimwèbimwè byàkenzàYe pàvwàYe pànu pa buloba abi! Mùshindù mwinè wùvwàbì bikèngela bwà twètù kwikala ne disànka's wè!

Tùsambilààyaaku mpindyewu, patùdì twinyika mitù yètù apa.

426 Mukalenge, cìvwa nditùkù dinène. Nànsha mudìbì ne, ndi ndyùmvwa ànu mùntù ndyùmvwa misangu yònsò amu, mwikàle mpangila. Ncyèna mwà kuleeja mpàlà waCì bímpè to, Mukalenge. Ndi ndòmba bwà Wèwè kumfwilakù luse bwà mishindù yànyì mikùtākàne eyi. Kaa, nyewu ntonda mpèkaatù yànyì kumpàlà Kwèbè, ne ndòmba luse, mumanyè ne kùdì Mwakwidi Munène mwimàne ku dyàbalùmè dyà Nzambi, mu Maulu mwàmwa, Uvwa kàyi muvwijìibwe mu mulongo wà Aalònà, bilòndèshìle mikenji ne byà ne ànu mikenji ne bikwàbò abi to. Kàdì Yèyè wàkatèèkiibwaMù bwà ngàsà wa Nzambi wàkatàngila mu matùkù àcìvwà àlwa awu, kumpàlà kwà difùkà dyà dyulu ne buloba, ne kummòna mèmè pa buloba apa, ne kufwà bwà mpèkaatù yànyì, bwà kungaaluja ku Bukalenge bwà Nzambi. Ndi nKwela twasakidila, Taatù, bwà cyòci eci.

427 Bwalu, Nyumà udi ukòòkesha mpindyewu mu cisàmbà Cyèbè ewu ngwa Cyendèlèlèlè ànu mùdì Nzambi wa Cyendèlèlèlè amu. “Ndi mbàpèèsha Mwoyi wà Cyendèlèlè, Mwoyi bwà kashidi, Mwoyi wà kashidi, ne bòbò kabààkubùtukakù to.” Ne ku Cilumbulwidi, bòbò kabààkwikalakù to. Bààmanyi kupicila ku dilumbulwisha. Bààbwedi mu Butùmbi. “Nènku ntentà wa pa buloba ewu yèyè munyangùke, tudi ne mukwàbò ukààdì mutwìndìle mwàmwa bwà kuyakù.” Twasàkidila bwà cyòci aci, Mukalenge.

428 Ndi ndòmba mpindyewu ne, kwòkò muntu mwaba ewu, dilòlòlò edi, utu kacya kàyikù mwanjì kunwà Mashì malelèlè a cipungidi, kàyi mumanyè cìdìWu wùmvwija, kayi mumanyè cìdì kulediibwa kwà cyàkàbìdì kùumvwija, kubwela mu bwobùmwe bwà cyà bushùwà ne Kilistò mu mwoyi wèndè, mulùme anyì mukàjì, swàku àMwakidilè ànu patùdì twakulangana apa, patùdì bindìle ne tufila mpùngà ewu apa. Nènku mu Ditùkù adi, tudi tulòmba bwà twikalèku baleejè mpàlà wa Èvànjeeliyò mu Bukènkè bwà cyà bushùwà. Tudi tulòmba, mu Dìna dyà Kilistò.

429 Patùcìdì ne mitù yètù miinyika apa, nkufwànyìnekù kwikalà muntu udi mwà kwela byanza byèndè muulu kùdì Kilistò anyì, kwamba ne: “Kilistò wa Nzambi, ikàlàku naanyì luse. Enzàku bwà mèmè, bu musadidi Webè udi kàyi mukùmbànyìne, ngààkidilèku Nyumà Mwìmpè mu mwoyi wànyì. Ne ùmpèèshèku ditwishiibwa ne dinanga dìndì naadì dijìnga”? Pawikalà kùyi Nèndè to, udikù ànu mwà kwela byanza byèbè muulu

kùdìYe anyì, wamba ne: “Mukalenge, eci ncimanyinu cyà ne ndi mMujinga”? Udikù mwà kwela cyanza muulu anyi? Nzambi àkubènèshè paanyimà pààpa, inābànza. Nzambi àkubènèshè apa mukalenge. Àkubènèshè apa, mukalenge. Nzambi ikalè neenù. Abi mbimpè. Muntu udi ku ntengu eku ewu, Nzambi àkubènèshè, mwanèètù wa balùme. Kùdikù mukwàbò kabìdì anyì, ànu pabwìpì ne twètù kujikija mpindyewu apa, ndi mwindile ànu bwà katanci kakesè cyanàànà. Nzambi àkubènèshè paanyimà pààpa, mwanàanyi wa balùme. Kùdikù mukwàbò muntu anyi?

430 “Ndi mpindyewu njinga. Ndi njinga, Mukalenge Nzambi. Wèwè udi mumanyè mwoyi wànyì. Udi mumanyè cìdì mu meeji àànyì. Wèwè: ‘Nyumà wa Nzambi ùdì ne mwoyi ne mutwè kutamba mwelè wà mvità wà nseke yibìdì, ùtāpa mene too ne ku ditāpulula dyà bwongò bwà mu mifubà, ne Mujinguludi wa meeji a mu mwoyi.’” Anji elàayibì meeji ku Cyòcì aci. Yèyè mmumanyè meeji èbè miine awu, tulumbilā twèbè atu.

431 Udikù mwà kwela cyanza muulu anyi? Ambà ne: “Ikālāku naanyì luse, Nzambi, mpindyewu mene. Ndi—ndi muswè bwà Ùmanyè ne ndi mumanyè ne ndi mupìile, ne ndi mfika ku dicimanya, kàdì ndi muswè kwikala mu bulelèlè.” Éyo, patùcìdì ànu balamè mitù yètù miinyika, tusambila mpindyewu apa, elāngānāku meeji bwà katanci kakesè cyanàànà. Katwēna baswè kulwijakaja pa bwalu abu to.

Lubwebwe lwà Bikondo, lupanda bwànyì
 mēmè,
 Ndisokòkèku munda Mwèbè;
 Māyì ne Mashi,
 Bìdì bizòlolkà mu lubadi Lwèbè amu abi. . .
 Bìikalèku bwà mpèkaatù manga àbìd-. . .
 (Manga àbìdì, Yèyè wàkadìcipila ku cyòcì aci,
 bintu bibìdì bìdì kabìyi bishintuludiibwa.)
 Binsungilèku ku ciiji cicolè ne bimvwijèku
 mukezùke.

Pāndì nkòka. . .

432 Éyì Mukalenge, enzàku aci ànu mpindyewu bwà twājingululakù bōnsò ne myeyelu yitùdì munkaci mwà kukòka eyi yīyaaya lubilu. Katwēna bamanyè ne mmikwàbò yingà yitùdì naayì kumpālā kwètù eku to. Byōnsò abi nku dilongolola Dyèbè dinène. Mbipāngadika kùdì Wèwè. Kaa, ikālāku neetù luse. Nēnku bwà aba bāvwa beelè byanza byàbò muulu abu, Mukalenge, kabyèna bikēngela bwà kubàtèèla nānsa. Wèwè udi mumanyè yōnsò wa kùdibò. Kàdì ndi ànu ndāmbula disambila dyà dyakwilangana edi bwàbò bōbò. Ndi ndōmba bwà Wūmushakù dipìila ku mwoyi wàbò, ne bālwekù ne dikima, mpindyewu mene, ku Nkwasa wa butūmbi; bāya ne dikima too ne ku Nkwasa wa butūmbi wa Nzambi, bānana dyèsè dyàbò dibāpēsha kùdì Nzambi. Wèwè ngwabāfikishì ku dyela dyà

byanza muulu ewu. Kabàvwakù bafwànyine kucyènza bôbò nkààyaabò to. Nènku ndi ndòmba, Nzambi, bwà wénzèku cyòci eci mu Dîna dyà Yesù. Amen.

. . . ndisokòkèku munda Mwèbè;

Mpindyewu, Mukuukwilaayi ànu cyanààna mpindyewu.

Mâyì ne . . . (Kaa, ekèlekèle!)

Bidi bizòlòlòke mu lubadi Lwèbè lutàpa mpùtà
amu abi,

Biikalè bwà mpèkaatù manga àbìdì,

Bìnsungilèku ku ciji cicolè ne bimvwijèku
mukezùke.

433 Mbanganyi bàdiku bàdyùmvwa bìmpè menemene mpindyewu? Elàku cyanza muulu, wámbe ne: “Mukalenge àtumbè!” [Disangisha didi dyamba ne: “Mukalenge àtumbè!”—Muf.] Kaa, Yèyè’s ngwa ùkèmesha’s! Kaa!

Kùdi Mwaba Ku Mpokolo. Udikù muwùmanyè anyì, Mwanètù wa bakàji Gertie? Tùyaaku. Mbanganyi bàtù banangè musambu awu? Mpindyewu netwikalè ne mudimu wà dibàtiiza, ànu mu katancì kakesè emu. (Newìkalè mwà kubàbàtiiza anyì?) Èyo.

. . . mwaba, èyowà, kùdi mwaba,

Kùdi mwaba ku Mpokolo bwèbè wèwè;

Mwaba, mwaba. . .

434 Èyo. Bàdi badìlongòlòle bwà dibàtiiza abu, bantu balùme nebàye ku eci cibambalu, bantu bakàji ku eci nùnkù, èyo, aba bàdì ne cyà kubàtiijiibwa mu Dîna dibèneshà dyà Mukalenge wetù abu.

. . . mwîmpè be bwèbè wèwè,

Kùdi mwaba ku Mpokolo bwèbè wèwè;

Nzambi ùdi mwîmpè be bwànyì mèmè,

Kùdi mwaba ku Mpokolo bwèbè wèwè.

435 Bantu bônso mpindyewu:

Mwaba, mwaba, èyowà, kùdi mwaba,

Kùdi mwaba ku Mpokolo bwèbe wèwè;

Kaa, mwaba, mwaba, èyowà, kùdi mwaba,

Kùdi mwaba ku Mpokolo bwèbe wèwè.

436 Kaa, mèmè ntu munangè musambu wà kale awu. Nwènu tohwè?

Kùdi mwaba ku Mpokolo bwèbe wèwè;

Kaa, mwaba, mwaba, kùdi mwaba búngì

cyanààna,

Kùdi mwaba ku Mpokolo.

437 Mpindyewu, pàcìdì mukùlù mubwelè apa, bwà kudìlongolola bwà kubàtiizangana, ndi muswèku kuumvwija batèèleji. Ne nènkonkèku bàmwè bàà ku balami, ní bàdi mwà kungumvwa mwinè mu cibambalu aci amu, piikalàbo

badilongòlòle, bàlwe bà—bàngambilè, bwà twamòna mwà kutentemuna bikòlokolo. Tudi baswè bwà nwènù bônso nùmonè eci. Netwènzè kàbìdì tusunsa tutwè ku dikùmi, nènku nebàtàngalajè èkèleeziyà.

438 Mpindyewu ndi muswè kunùbadilakù yìmwè yà ku Mifùndu minsantu. Ndi muswè kuYibala mu Mukàndà wà Byenzedi. Nènku ndi muswè kubangila ku mvensà wa 12 wa nshapità mwi2 wa Byenzedi.

439 Mpindyewu, ndi muswè nùmonè mu nshapità wa 16 wa Luukà Munsantu, anyì wa Maatàayi Munsantu, ngeela meeji ne mmwòmò, mùvwà Yesù ùmuka ku mukùnà amu. Bàvwa. . . Wàkambila bayiidi Bèndè ne: “Bantu bàdi bàmba ne ndi Nganyi Mèmè Mwànà wa muntu?”

440 “Bàmwè bàdi bàmba, mòna’s, ne Udi ‘Eliyà.’ Ne bakwàbò bàdi bàmba ne Udi—Udi ‘Mupròfetà awu.’ Ne bakwàbò bàdi bàmba ne Udi *cikampànda* anyì *cikansanga*.”

441 Yèyè kwamba ne: “Kàdi nwènù nudi nwamba ne Ndi Nganyi?”

442 Ki Peetèlò kwabayè ne: “Udi Kilstò, Mwànà wa Nzambì udi ne mwoyi.” Mmwòmò anyì?

443 Yesù kwambaYè ne: “Udi mubènèshìibwe, Simonà Bààyona, bwalu munyìinyi ne mashi kí mbìdì bikubuulwìle eci to. Kacya kùtukù mukayiilè mu sèminèrè kampànda to. Kacya kùtu muCiyiilè kùdì muntu to.” Yèyè ne: “Kàdi Taatù Wanyi udi mu Dyulu ngwàkubuulwidì eci ewu. Nènku Mèmè ndi ngamba ne wèwè udi Peetèlò. Pa lubwebwe elu mpàNgìibakilà Èkèleeziyà Wanyi. Biibi byà ifèrnò kabyàkuMutàmba bukòlè to. Ne Ndi nkupèèsha nsapi yà Bukalenge bwà mu Dyulu.” Mmwòmò anyì? “Ne cyònsò cyùdì usùulula pa buloba aci, Mèmè nèncisùulè mu Dyulu. Cyùdì uswika pa buloba aci, Mèmè nènciswikè mu Dyulu.” Ki CìvwàYe muswè kwamba anyì? Pàtupù Kàvwa mwà kwikala muCyàmbè to. Mpindyewu, pàvwà cikondo cyènda ciya apu, mpindyewu, Peetèlò ùvwa ne nsapi yà Bukalenge ayi.

444 Mpindyewu, nwènù beena Kàtòlikè, nudi bafwànyine kwela meeji nùnkù, munùdì nwamba ne: “Èkèleeziyà wa Kàtòlikè mmwibakilà pa Peetèlò.” Èyo, netùjandulè ne: “Bòbò mbàvwà ne nsapi ayi. Èkèleeziyà wa Kàtòlikè ngucìdì ànu ne nsapi ayi.”

445 Twànjàayi kujandula cyàkenzà *Peetèlò* ne nsapi ayi, nwamònu’s, dìbà adi netùjandulè. Bible wàkambila, Peetèlò ne bakwàbò bàpostòlò abu ne: “Ndàayi pa buloba bujimà. Ewu yònsò unùdì nulekeleela mpèkaatù awu, neyìikalè mimulekeleela. Ewu yònsò unùdì nulaminyina mpèkaatù awu, neyìikalè mimulaminyina.” Aci, mèmè ndi mufwànyine kucyàmba ne. . . Muntu mmufwànyine kupanga kuumvwa cìndì muswè kwamba aci. Yesù wàkambila bàpostòlò ne: “Ewu yònsò unùdì nufwila luse ku mpèkaatù awu, Mèmè pàanyi nèmufwilèyi luse. Ne ewu yònsò unùdì kanùyi

nufwila luse ku mpèkaatù, numulaminayi awu, Mémè pàanyi nèmmulaminyinèyi.” Ki cyàkambà Yesù ncyôci aci.

446 Tàngilààyaaku nùmonè kùdì èkèleeziyà wa Kàtòlikè ùya ne bwalu abu.

447 Kàdi tùjandulàayi mwàkacyènzàbo bôbò. Pashiishe twètù bajandùle mwàkacyènzàbo, díbà adi's bìvwa bìkèngela twètù kucyènza mùshindù wùm wèwùm wè awu. Mpindyewu tùjandulàayaaku.

448 Tudi mu Ditùkù dyà Mpenta. Èkèleeziyà ùdi munkaci mwà kubanjijibwa. Bàvwa bônso mu cibambalu cyà kuulu. Bantu kupàtukabò muntwamu, bàakula mu myakulu mishìllàngàne. Bwà cinyi? Mwakulu ne mwakulu wônso wà mwinshì mwà Dyulu wùvwa muleejìbwè muntwamu. Anglais ùvwamù pèndè. Bivwa bìkèngela bwà mwakulu ne mwakulu wônso wà mwinshì mwà Dyulu kwikalawù muntwamu, mwakulu wônso wùvwàku wàkudiibwa mu miine matùkù awu awu. Mmutùngùnùke kaaba aka ne kutèela yàbùngì yà ku myakulu ayi, ne mùvwà ba-Crétois ne beenyi, ne bàà ku Loomò bàvwà biitàbe diitabuuja adi abu, ne—ne—ne Bàlabù, ne bônso bàakula ne bàtùmbish- . . . Mpindyewu, kabàvwa bàakula mu myakulu myenyi to. Bàvwa bàakula mu myakulu mimanya, bàakula ne bantu. Kacivwa myakulu myenyi to, kàdi mmyakulu yìvwà muntu yônso ùmvwa. Ngènzàmpèkàatù, mwena bupidyà, bàvwa bùm vwa civwàye wamba aci. “Mmunyi mutùdì tuumvwa mu mwakulu wètù sungasunga, wà—wà kùdìbo batùlelèlè?”

449 Mpindyewu tàngilàayi. Mpindyewu lukonko lùdì lùjuuka. Mpindyewu: “Bakwàbò bàvwa bàseka.” Mvensà wa 12, èyo.

Ne bônso bàvwa bàkèma bikolè, ne . . . mu mpatà, bàmbilangana muntu ne mukwèndè ne: Eci cidi cyumvwiya cinyi?

Bakwàbò bàvwa bàseka bàmba ne: Aba . . . mbùle tètè ne mvinyò mupyamùpyà.

450 Bàvwa bàbàseka. Bwalu, bàvwa bènza bishi? Bàvwa bàtetuka bu bantu bakwàcìke maalà, bu bantu bakwàcìke maalà. Bàakula, kabàyi bamanyè civwàbo bàmba to, kàdi biikàle bàyiisha disangisha mu myakulu yìvwàbo kabàyi bamanyè to, kàdi disangisha adi dyôdì kaayi dìvwa dimanyè. Nwamònu anyi? Èyo.

Bakwàbò . . . bàakamba ne: Bôbò mbùle tètè ne mvinyò mupyamùpyà, tàngilàayi nùmonè mùdìbo bènza maalu.

Bakwàbò bàvwa bàseka, bàmba ne: Aba . . . mbùle tètè ne . . .

“Kàdi Peetèlò . . .” Wàmánya's, mulùm yànà! Wèwè ewu's ngudi ne nsapi ayi.

Kàdi Peetèlò, mwimàne pàmwè ne bààdikùmi ne umwe abu, kubàndishayè dìyì, kubàmbilayè ne, . . .

Mpindyewu, vùlukààyi ne, edi ndibanjija dyà kumpàlà dyà Èkèleeziyà.

. . . Nwènu beena mu Yudààya, ne . . . nwènu bàdi basòmbèle mu Yelusàlèma, eci cimanyiiwbè kunùdi, ne tèelejààyi mèyi àànyi:

Bwalu bantu aba kì mbakwàcìke maalà, munùdi nwènu nucinka amu to, pa kumòna ne tucìdi ànu díbà citèemà wa ditùku.

Binwínu byà maalà kabìvwa nànsha bikàngula díbà adi to. Nwamònu anyì?

Kàdi eci ncyàkambàbo kùdi mupròfetà Yowèlè ne:

. . . nebyènzekè ku matùkù a ndekeelu, mùdi Nzambi wàmba, Mémè nêngùcìkijè Nyumà wanyì pa mubidi wònsò. pa bânà bèènu balela balùme ne . . . bakàji, ne bóbò nebàmbè bipròfetà, ne nsongàalùmè yènu neyimònè bikèèná-kumòna, ne banunu bèènu nebàlootè bilòdòtà.

Ne pa basadidi bàànyi ne . . . basadidi bàànyi bakàji Mémè nêngùcìkijè Nyumà wanyì mu matùkù awu; . . . nebàmbè bipròfetà.

Ne mémè nêndeeyè maalu a kukèma muulu mu dyulu, ne bimanyinu pànshì pa buloba; . . .

Mpindyewu, awu m'Peetèlò udi uyiisha mpindyewu, mwine udi ne nsapì ayi awu.

. . . mashi, . . . kapyà, . . . mabungi a mwishì;

Dìbà nedyàndamukè midimà, . . . ngondo neàndamukè mashi, kumpàlà kwà diinè ditùkù dinène ne dyà butùmbì dyà Mukalenge adi kulwadì

Ne nebyènzekè ne, ewu yònsò wasòka dìnà dyà Mukalenge awu neàsungidiibwè.

Nwènu beena Izalèlèlè, tèelejààyi mèyi aa; Yesù wa mu Nazalèètà, muntu mwanyishiiwbè kùdi Nzambi munkaci mwènu ku bishimà ne maalu a kukèma ne cimanyinu, bìdiye yèyè mwenzè . . . munkaci mwènu, . . . nwènu biinè . . . bamanyè;

Nwakula pèènu bwà ditàndisha? Yèyè nguvwa ne nsapì ayi's, nudi bamanyè's. Kwikalà . . .

Yèyè, mufidiibwe ku dipàngadika ne didyànjiila-kumanya dyà Nzambi, . . .

Ki bwalu mbwabù's. Mmunyi mùvwà Yekù mwà kufidiibwa? Bwalu Nzambi ùvwa mudyànjiile kulongolola bwà kwikalaci mùshindù awu. Nwamònu anyì? Didyànjiila-kumanya dyà Nzambi's!

⁴⁵¹ [Mwanèètù wa balùme kampànda ùdi wàmba ne: “Byàkumbanyi anyi?”—Muf.] Katanci kakesè cyanààna. BàmBILE ne, bìndilèku ànu kasunsa kàmwè cyanààna, too ne pàndì njikija Mufundu ewu.

. . . nudi bangàte, ku byanza byà beena lwonji, kumupoopela pa nkùrusè ne kumushebeya.

Yèyè udi Nzambi mubiishe ku lufù, ne mumusiùlùle ku bisaamà byà lufù, bwalu kabivwa mwà kwenzeka . . . bwà kulamiibwayè kùdilu to.

Bwalu Davidi wàkaakula bwà bwalu bwèndè ne: Mvwa misangu yònsò mudyànjile kumòna Mukalenge . . . ku dyàbalùme dyànyì, ne mèmè ncyàkunyungishiibwa to.

Ki bwà cinyi mwoyi wànyì wàkacyònkomoka, ne ludimì lwànyì lwàkavwijiibwa ne disànka; kàbìdì . . . mubidi wànyì newikishè mu ditèkemenà,

Bwalu wèwè kwàkulekela musùukà wànyì mu ifernò, anyi wèwè kwàkwitaba bwà Wa Cijila webè àmonè dibola nànsha.

Wèwè udi mumfikishe mèmè ku dimanya . . . njila yànyì—yànyì, njila yànyì yà mwoyi, wèwè neunguujè tètè ne disànka ne ne lukebu lwànyì.

Balùmyànà ne bānà bèètù, ndekèlaayikù ngàakule mudìlekèlèle nnwāmbilè bwà nkambwà Davidi, . . . yèyè mmufwè ne mujiikūibwe, ne lukitā lwèndè lūdi munkaci mwètù emu . . . ne leelù ewu.

Ki bwà cinyi bu mùvwàye mupròfetà, ne mumanýè ne Nzambi mmudicìpile ku mucipù . . .

Ndi mufùme ku diciyiisha.

. . . ne bilondèshile—bilondèshile mamuma a twonyi twèndè, yèyè ùvwa . . . bilondèshile mubidi, yèyè ùvwa mwà kujuula Kilistò bwà kusòmbayè pa nkwasà wèndè wa butūmbi,

Ànu cìndì mfùma ku diyiisha’s. Peetèlò ùyiisha cintu cìmwèmwè aci.

Nènku mwikàle ùmòna cyòci eci kumpàla (Mmupròfetà awu wàkacimòna kumpàla.) wàkaakula bwà dibùikà dyà Kilistò ku lufù ne, musùukà wèndè kawàkashiyiibwa mu ifernò to, anyi mubidi wèndè kawùvwa ne cyà kumòna dibola nànsha.

Yesù udi Nzambi mubiishe ku lufù ewu, bwalu butùdi twètù bònsò bantèmù.

Ki bwà cinyi mwikàle mubàndishiibwe, ne ku dyàbalùme . . . mwikàle ku dyàbalùme, mubàndishiibwe mu dyulu, mupetè kùdì Taatù . . . mulayì wà Nyumà

Mwîmpè, yéyè. . . mmwicikije cyôci eci, cinùdi nwênù numòna ne nuumvwa eci.

Bwalu Davidi kàakabanda mu dyulu to, (mupròfeta awu): kàdi yéyè wàkamba yéyè mwinè ne: MUKALENGÉ mmwambile Mukalenge wanyi ne: Sòmba ku dyàbalùmè dyànyi,

Too ne pàngààvwijà beena lukunà bèèbè citèèkedi cyà makàsà.

Ki bwà cinyi (tèelejàayi eci) nzùbù mujimà wa Izalèlèlà àmanyè ne ditwishiiibwa dyònsò ne, Nzambi wàmanyi kuwija Yesù umwèumwè ewu, unùdi nwênù. . . bapoopèle pa nkùrusè ewu, Mukalenge ne Kilistò.

S'bivwa bikèngela bwà aci kukòsaci bwalu's, kî mmwômò anyi?

Mpindyewu pàakumvwàbo cyôci eci, bangènzàmpèkààtù abu's, bàakalengiibwa bikokè mu myoyi yàbò, nènku bàakambila Peetèlò. . . Balùmyànà. . . ne Peetèlò ne. . . bakwàbò. . . bàpostòlò ne: Balùmyànà ne bânà bèètù, tudi ne cyà kwenza cinyi?

452 Èyo. Ki bwalu mbwebù's. Cidiye naaci ncinyi? Nsapì, nsapì wa ku Bukalenge. Bukalenge bùdi penyi? Bùdi munda mwèbè amu. Ncyà bushùwà anyi? Nyumà Mwîmpè ngudi Bukalenge bwà Nzambi. Aci tudi bamanyè. Tudi tulediibwa mu Bukalenge abu, bu beenamù ne baaminyàmpalà. Tàngilàayi. Ùdi ne nsapì ku mikàbà. "Newènzè naayi cinyi?" Ewu mmusangu wà nzànzànzà wàkakàngudiibwà ciibi aci.

453 Mpindyewu, lukonko ndwela muyiishi awu, bwà musangu wà nzànzànzà, mwinè udi ne nsapì awu. Ngeela meeji bu yéyè mwabè ne: "Imànyinà pa mutù wèbè awu apu," nùnkù cyôci aci's ncishààle cimanyike ne ciitàbiibwe.

454 "Cyònsò cyùdi wèwè uswika pa buloba aci, Mémè nènciswikè mu Dyulu." Èyo. "Cyònsò cyùdi wèwè wamba aci, Mémè nèngàmbè cintu cimwècimwè aci. Wèwè ngudi ne nsapì." Èyo. Ùdi ùbweja nsapì ùyisàka mu ciibi.

. . . Cyùdi wenza ncinyi? Balùmyànà ne bânà bèètù, tudi ne cyà kwenza cinyi?

Mpindyewu pàakumvwàbo cyôci eci, bôbò bàakalengiibwa bikolè mu myoyi yàbò, ne bàakamba. . . Balùmyànà ne bânà bèètù, . . .

. . . Peetèlò wàkabàmbila ne: Nyingàlalaayi, ne nùbàtiijibwè muntu ne muntu wa kunùdi mu dîna dyà Yesù Kilistò bwà dilekelediibwa dyà mpèkaatù, nènku nwênù nenùpetè kupà kwà Nyumà Mwîmpè.

Bwalu mulayi wùdi kunùdi, ne kùdi bânà bèènù balela, ne kùdi aba bàdi kule menemene, mu búngi bwònsò bwàbùkilàbo kùdi Mukalenge Nzambi wetù abu.

Aci kukòsaci bwalu kashidi. Kacya, nànsha mu cikondo kaayi, bantu nànsha biikàle banganyi, kabàvwakù mwà kwamba bìbèngangana ne Aci to.

⁴⁵⁵ Èkèleeziyà wa Kàtòlikè kulwayè, pamutù pàa kwinyijiibwabò mu màyi, bóbò bàdi bàmyaminangana màyi. Pamutù pàa kukwàta mudimu ne Dìna dyà Yesù, bóbò mbangàte, “Taatu, Mwànà, ne Nyumà Mwimpè.” Kacyakacya aci kacitukù cilongeshiibwe mu Bible to.

⁴⁵⁶ Muntu yònsò, kubangila ànu musangu awu, wàkabàtijiibwa ku diinyijiibwa mu màyi mu Dìna dyà Yesù Kilistò. Nènku bàmwè bàvwa biinyijiibwe mu màyi kùdi Yone Mubàtiji, mwine wàkabàtiiza Yesù awu, kàdi Pòlò wàkabàmbila ne kabàvwa mwà kupeta Nyumà Mwimpè mùshindù awu to. Byàkèngela bwà kwalukilabò ne kubàtijiuludiibwabò, cyàkàbìdi, mu Dìna dyà Yesù, kumpàlà kwà kumònabò mwà kupeta Nyumà Mwimpè. Mbanganyi bàdi bamanyè ne aci ki Mufùndu? Byenzedi, nshapità wa 19. Ki bwalu mbwabù's. Bwalu, Bukalenge bwà mu Dyulu bwàkàkàngiibwa bwà mungà mùshindù kanà wònsò, ku mucipù kùdi Yesù Kilistò ne, aci ncìvwà mwà kwikala cimanyike ne ciitabiibwa mu Dyulu.


... Nyingàlalaayi, ne nùbatijiibwè muntu ne muntu wa kunùdi mu Dìna dyà Yesù Kilistò bwà dilekelediibwa dyà mpèkaatu yènù, ... nwènù nenùpetè kupà kwà Nyumà Mwimpè.

Bwalu, mulayi wùdi kunùdi, ne kùdi bàna bèènu balela, ... kùdi aba bàdi kule menemene, mu búngi bwònsò bwabiikilàbo kùdi Mukalenge Nzambi wetù abu.

Amen. Tùsambilàayi.

⁴⁵⁷ Taatu Nzambi, dilòlò edi, bidimu cinunu ne nkàmà citèemà ne byà mu njila bikaadi bipite, kàdi meeji matòoke ne bululàmè bwà myoyi yà bantu bìcidi ànu byèla mbilà kùdi Nzambi, byenzè mùtù bàna bàdila bàlomba mabèèlè a mu cyàdi cyà mamwàbò amu. Tudi baKunangè, Mukalenge. Katwènakù mwà kwikala ne mwoyi Wèwè kuyikù to. Bu mwàkambà Davidi ne: “Musùukà wànyi wùdi wùKujinga, mùtù ngulungu ùjinga kasulù kàà màyi.” Yèyè ùdi ne cyà kuCipeta, cyanààna ùfwafwa.

⁴⁵⁸ Nènku Taatu, twàkenkèci mu Mifùndu, munda ne paanyimà. Kabiyi bwà kupangakana to, kàdi tudi tumòna sèminère eyi, balongi bàà tèlòjì aba leelù ewu, bàdi bàlongesha bilondèshile mèyi matuma a bantu, kàdi kaayi mèyi matuma a Nzambi to. Ki bwà cinyi, Mukalenge, katwèna tupeetula bantu abu to, kàdi tudi tupeetula bintu bidìbo bàlongesha abi. Ki bwà cinyi, Mukalenge, tudi tulòmba bwà bàlwe bàna bèètù. Tudi tulòmba bwà Ùbàfwilèku luse ku dipanga dyàbò adi. Nènku tudi tulòmba bwà bàalwakù ku Mufùndu, bààWùbalakù, kabiyi mu mùshindù wùdi sèminère kampànda ùWùlongesha to, kàdi bilondèshile mùshindù wùdi Nzambi mu Wùfunde.

⁴⁵⁹ Tudi tulòmba, Nzambi, mpindyewu, bwà bàdì badilongòlòle bàdì bàlwa dilòlò edi bwà dibàtiiza dyà mu màyi abu, pàdì mpaasàtà wetù wa bukitù awu ùbànda mu cyambilu ùmukila kaaba aka, bwà kuyiisha Èvànjeeliyò, Èvànjeeliyò umwèumwè ewu, ne pashiishe ùya ku ciinà cyà dibàtijiilangana, bwà kujiikangana, enzàku, Mukalenge, bwà yònsò wa ku bôbò aba àpetè Nyumà Mwîmpè, bwalu Wêwè ngudi mufile mulayi ne: “Nenùpetè Nyumà Mwîmpè.” Swàku bwà Nyumà wa Nzambi ìkalè mwindile pamutù pàà màyi, bwà kwakidila udi mudilongòlòle awu dilòlò edi, bwalu tudi tubàlàmbula mu byanza Byèbè, mu Dîna dyà Yesù Kilstò. Amen. 

EBÈLÙ, NSHAPÌTÀ WÀ MWANDAMUTEKÈTE ² LUA57-0922E
(Hebrews, Chapter Seven ²)

DILONDANGANA DYA MALONGESHA PA MUKÀNDÀ WÀ EBÈLÙ

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu dyàlumingu dilòlò, mu matùkù 22 a ngondo wa citèemà, cidimu cyà 1957, mu Branham Tabernacle mu Jeffersonville, Indiana, U.S.A. Ndyumusha pa mukaba wa mēyì ne dituuta ku cyamu mu kaabujima kààdi mu Anglais. Nkudimwinu wa mu Ciluba ewu mmutuuta ku cyamu ne mwabanya kùdi Voice Of God Recordings.

CILUBA

©2022 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org